



SABL – Sampela kampani giaman long katim diwai

Kilim skin long gutpela sindaun long bihain taim...



EKSEM TAIM: Planti gret 10 insait long kantri i wok long mekim eksem o tes bilong ol nau long painim ples long gret 11 long 2016. Dispela yia ol senisim eksem i kamap long wanpela wik tasol. Long ol sampela yia i go pinis ol gret 10 na 12 save kisim tupela wik long mekim eksem bilong ol. Poto i soim Regina Eric na Tovi Daniel bilong Gerehu Sekenderi Skul i brukim het long eksem. *Poto Nicky Bernard.*

GAVANA bilong Oro, Gary Juffa i tok planti ol timba kampani i bin giamanim ol manmeri long katim diwai, salim na kisim mani aninit long Spesel Egrikalsa na Bisnis Lis (SABL).

Mista Juffa i tok planti ol dispela timba kampani i bilong Esia. Em i tok ol i bin mekim wanpela kain paul pilai wantaim ol ‘pablik sevan long Waigani’ na kamapim dispela SABL samting long katim diwai na bagarapim bus, graun na wara.

Mista Juffa i tok ol dispela kampani i bin giaman na kisim SABL lis long kirapim wok egrikalsa. Planti ol papagraun, em ol lain bilong ples na i no save long rit na rait, na i ting olsem ol dispela kampani i laik planim tru kakau, kopra o welpam na ol i kam insait long ples bilong ol.

“Ol i no kisim ol masin bilong planim kaikai, ol i kisim ol masin bilong katim diwai. Ol dispela masin i bagarapim bus, graun na wara,” Gavana Juffa i tok.

Em i tok planti ol papagraun i ting kampani husat i kisim SABL bai planim ol kaikai na ol i larim kampani katim ol diwai. Taim ol i katim diwai pinis, ol i no wari long planim kaikai.

Sampela ol kampani i lusim ples taim ol i salim ol diwai pinis na kisim mani.

Mista Juffa i tok gavman i mas sapotim ol papagraun na kotim ol foren kampani.

“Ol papa graun i mas kisim olgeta mani na ol arapela samting olsem masin bilong ol dispela kampani,” Mista Juffa i tok.

Em i tok gavman mas glasim gut na luksave olsem ol foren kampani, we planti taim yumi save kolim ol investa, i no save kam mekim bisnis long stretpela rot aninit long lo.

“No gat wanpela manmeri PNG bai go mekim bisnis long Saina o Malaysia. Nogat tru. Gavman bilong ol bai no inap larim wanpela PNG bisnis manmeri i mekim timba bisnis long kantri bilong ol,” Mista Juffa i tok.

Gren Sif lusim NA - P2



Risev polis kam bek - P3,6



PNG Eye Care i luksave long Wol Sait De - P11

Reach anyone in PNG on the friendlier network



Switch to bmobile-vodafone at a store near you.



76003555

www.bmobile.com.pg

Connect with us on  




Gren Sif lusim NA

GREN Sif Sir Michael Somare i risain na lusim Nesanel Alaiens (NA) politikel pati we em yet i bin kamapim na kirapim long las 20 yia.

Sir Michael risain las wiken bihain long em i no wanbel long Praim Minista Peter O'Neill i ranim dispela kantri.

NA em i wanpela kolisen patna bilong Pipels Nesanel Kongres (PNC) pati bilong Praim Minista O'Neill na Tressera Patrick Pruaitch em i pati lida.

Long risain pas (leta) em i givim long Mista Pruaitch, Sir Michael i tok em i laik lusim NA bikos long disisen em i bin mekim las wik long larim Ombudsman Komisn (OC) i glasim na sekim sapos Mista O'Neill, Gavana Jeneral Sir Michael

Ogio na arapela ol lida man i brukim Lidasip Kod o nogat.

"Mi raitim dispela pas long tokim yu tingting bilong mi long lusim NA pati. Mi les long bagarapim nem bilong NA na poroman em gat wantaim PNC na narapela ol kolisen pati husat i stap long gavman."

"Long larim gutpela nem bilong NA pati i stap yet, mi laik lusim dispela politikel pati tasol stap olsem Memba bilong Palamen nating na askim Ombudsman Komisn long sekim sapos Praim Minista O'Neill i brukim Lidasip Kod o nogat," Sir Michael i tok.

Presiden bilong NA Walter Schnaubelt and jeneral seketeri Joyce Grant i kisim pinis kopi bilong dispela risain pas bilong Sir Michael.

Las wik, Sir Michael bin autim strongpela toktok long larim OC i sekim Mista O'Neill, Sir Michael Ogio, pastaim Palamen Spika Jeffrey Nape na sampela minista, memba na sinia pablik sevan husat i bin stopim em long kisim bek sia bilong em olsem praim minista bilong PNG long 2011 na 2012 taim tupela Suprim Kot jasmen i bin painin- aut olsem Mista O'Neill i no bin bihainim lo long kisim ples bilong Sir Michael olsem praim minista.

Sir Michael i bin painim bikipela sik na klostu i lusim laip long Julai 2011 na em i bin go long wanpela haus sik long Singapo.


Taim Sir Michael i bin stap aut yet long Singapo haus sik, Palamen i bin makim Mista O'Neill i

kamap praim minista.

Tasol 5-man bens Suprim Kot i bin painim- aut olsem Sir Michael em i praim minista yet na Memba bilong lalibu- Pangia i no bin bihainim lo kisim sia bilong praim minista.

Mista Nape i bin autim tingting bilong em olsem pastaim Palamen Spika. Em tok olgeta samting Palamen i bin mekim long makim O'Neill kamap praim minista i bin bihainim olgeta lo na pasin bilong makim praim minista insait long palamen.

Mista Nape i tok lo i tambuim ol memba o arapela man nating long kotim Gavana Jeneral, husat i maus man bilong Her Majesti Kwin Elizabeth II - kwin bilong Ing- land, Komonwelt na PNG.



GREN Sif Sir Michael Somare

PM strongim wokbung namel long PNG na Japan

PRAIM Minista Peter O'Neill i kamap pinis long Japan na dispela lukluk raun bilong em bai strongim pasin poroman namel long Papua Niugini na Japan.

Mista O'Neill wantaim meri bilong Lynda Babao-O'Neill, Foren Afeas Minista Ribbink Pato, Nesanel Plening Minista Charles Abel, Pablik Entaprais Minista Ben Micah na moa long 30 PNG bisnis manmeri i go long Japan. Praim Minista bilong Japan Shinzo Abe i bin invaitim Mista O'Neill long go lukim Japan.

Taim ol i bin kamap long Tokyo, ol opisa bilong gavman bilong Japan i bin redi long bungim na tok welkam long Mista O'Neill wantaim dispela delegesen bilong PNG.

Planti plak bilong PNG na Japan i bin hangamap arere long rot na strit we Mista O'Neill i bin go long en. Dispela i soim wanbel pasin na yuniti namel long tupela kantri.

"PNG delegesen i amama long gavman bilong Japan long welkamim mipela," Mista O'Neill i tok.

"Japan na PNG i poroman na i wok long strongim dispela pasin yuniti na poroman long bisnis na ol kalsa samting.



Praim Minista Peter O'Neill i kamaut long Falcon Jet long Tokyo ples balus we ol Japan gad ov ona i wetim em wantaim red kapet welkam.

"Mi amamas long bungim Praim Minista Shinzo Abe na toktok wantaim em long sampela samting

long kirapim gutpela samting namel long tupela kantri bilong yumi."

Long Tunde apinun, Mista O'Neill i bungim ol mausman bilong ol kampani Marubeni, Sojitz na JX Nippon. Bihain long en, em i go long wanpela bung bilong Japan-PNG Asosiesen na Japan-PNG Palamentri Frensip Lig.

Mista O'Neill bai sainim agrimen long larim manmeri PNG na Japan i kisim visa long ples balus.

Em bai sainim agrimen long kirapim Nadzab ples balus rikonstraksen projek na Pot Mosbi Suris sistem appret projek.

Asde (Trinde) moning, Mista O'Neill i bin toktok wantaim Empra bilong Japan Akihito na Empres Michiko na long apinun em bin toktok wantaim Praim Minista Abe.

Mista O'Neill bai go lukim Soka Univesiti na toktok wantaim ol senia sumatin na ol tisa husat save mekim wok painim- aut o risets.

Bihain long en, em bai go long Osaka Ges LNG Risiving Teminal we ges bilong PNG LNG i save go long en.

Nawae go long Lae long wokim gret 10 eksem

Moa long 300 gret 10 sumatin bilong Nawae Lutheran Haikul i sindaun mekim nesanel eksem long Immanuel Lutheran Skul Hol, long Lae siti long dispela wik.

Long dispela yia Nawae Lutheran Haikul i bin bungim hevi long taim ol toktok bilong kompensesen i bin kamap long graun we skul i sanap long en.

Ol papagraun i bin singaut long Nawaeb distrik na Morobe provinsal gavman long baim ol.

Ol i bin pasim dua bilong skul na administresin wantaim Provinsal Edukesen Bod, PEB i wanbel na salim olgeta gret 9 sumatin i go bek long ples na i holim ol gret 10 tasol i stap long skul.

Ol gret 9 bai kam bek ripit long neks yia 2016 sapos no gat samting i kamap long stretim hevi bilong graun.

Het tisa bilong skul, Mista Kosiang i bin wok bung na helpim ol papagraun long painim mani olsem K 100,000 long distrik.

Tasol nau yet mani slip long benki i stap inap ol atoriti i painim- aut na stretim olsem husait i trupela papagraun.

Ol papagraun i tambu long ol gret 10 i no ken sindaun long 2015 Nesanel Eksem long Nawae Haikul. Olsem na nau yet ol gret 10 i go long Lae na wokim eksem long bikipela hol bilong Immanuel Lutheran Haikul.

Immanuel, Nawae na Bumayong Lutheran Sekenderi skul em ol sista skul we ol inap helpim ol yet i taim i gat hevi olsem i kamap long Nawae.

Inap long politiks: O'Neill tokim Somare na Mekere

PRAIM Minista Peter O'Neill i tokim tupela pastaim praim minista bilong PNG long no ken mekim politiks moa tasol lukluk long ol gutpela samting gavman i wok long mekim long senisim laip bilong ol manmeri na kirapim kantri.

Mista O'Neill i tokim Gren Sif Sir Michael Somare na Sir Mekere Morauta long stopim ol toktok long politiks na toktok long wanem gutpela polisi o samting tupela i bin mekim long senisim laip bilong ol pipel long taim tupela i bin stap praim minista.

"Ol yia we Morauta-Somare i bin

stap praim minista i lukim gavman i lus tingting long pipel na lus tingting long givim ol besik sevis long pipel," Mista O'Neill i tok.

Mista O'Neill i mekim dispela toktok bihain long Sir Michael na Sir Mekere i tokim em long risain na lusim sia bilong praim minista bikos em i no lukautim gut ikonomi bilong kantri.

"Insait long 10 yia, no gat wanpela rikrutmen bilong nupela polis manmeri i bin kamap long Bomana Polis Trening Kolis, ol haus sik i bin pundaun, ol skul i bin pas na ol pikinini i bin raun nating long strit

"Taim tupela i bin stap long pawa, tupela wantaim i bin stap longwe tru long pipel na i no bin stap klostu long harim krai na singaut bilong pipel," Mista O'Neill i tok.

Long dispela wik, Sir Michael na Sir Mekere i tokim Mista O'Neill long risain bikos em i no lukautim gut ikonomi bilong kantri na em i wok long bagarapim bihain taim bilong pipel bilong dispela kantri.

Taim 13 de tasol i stap long Palamen i sindaun gen long Oktoba 27, tupela i laikim Mista O'Neill long lusim sia bikos em i wok long gia-

man planti na mekim ol pasin we bihain taim bilong dispela kantri bai no inap stap gut.

K3 bilien UBS dinau mani PNG i bin kisim em i wanpela as we Sir Michael na Sir Mekere i tokim O'Neill long risain.

Tasol Mista O'Neill husat i nau raun long Japan, i tok, "Ol pipel i ken lukim tru tru senis nau i kamap long kantri insait long 4-pela yia tasol bikos planti pikinini i stap nau long skul, ol manmeri i kisim fri helt sevis, lo na oda i stap gut, na nupela rot na bris i kirap long planti ples."

Baki kisim risev polis kambek

POLIS Komisina Gari Baki i mekim wanpela disisen long las wik Fraide long kisim ol risev polisman i kambek long polis fos.

Tasol ol risev polis manmeri bai no inap kisim alawens o potnait mani long wok ol bai mekim long sevim polis fos na daunim lo na oda asua insait long komyuniti, Komisina Baki i tok.

Komisina Baki i mekim dispela disisen bihain long em i bin holim wanpela miting wantaim ol maus man bilong gavman na praivet sekta ogenaisesen.

Oi i bin sainim wanpela agrimen long larim risev polis yunit i kambek long polis fos.

Oi risev polis man i bin stop long mekim polis wok long yia 2008 bihain long ol i no bin mekim gut ol polis wok.

Polis Administretiv Riviu Ripot i bin painimaut dispela. Dispela em i wanpela bilong 61 rekomendesen dispela riviu ripot i painimaut.

"Tude yumi gat moa long 6, 000 polis manmeri insait long kantri. Long bihainim laik bilong Yunaited Nesens (UN), mipela bai apim namba bilong polis manmeri i go antap long 18, 000, we PNG i nidim mo long 12, 000 polis manmeri," Mista Baki i tok.

Em i tok namba bilong polis manmeri bai go antap taim ol dispela risev polis i go bek gen long polis fos.

Mista Baki i tok Bomana polis kolis i gat spes long skulim na trenim 1, 000 polis manmeri tasol long wanpela yia, na tu polis i nogat mani long trenim mo polis manmeri long apim namba na strong bilong polis fos bilong kantri.

Em i tok aninit long lukluk bilong en, em i laik daunim lo na oda asua insait long komyuniti na larim ples i stap gut na sindaun bilong manmeri i stap gut tu.

"Mi laik daunim lo na oda asua. Na ol risev polis i ken givim mipela sapot na mekim stretpela wok long daunim lo na oda asua," Mista Baki i tok.

Tasol em i givim strongpela tok lukaut long ol risev polis long noken paitim manmeri nating na kamapim hevi na birua.

"Ol risev polis man i mas mekim wok gut. Ol i mas bihainim lo na mekim stretpela wok," Mista Baki i tok.

Dokta Yala: PNG nidim planti save man

PNG i no gat planti save man husat i gat mastas na PhD digri. Dispela em i toktok bilong Dairekta bilong Nesene Risets Institut (NRI) Dokta Charles Yala.

Dokta Yala i tok ol manmeri husat i pinisim PhD digri i save kamap leksera bilong ol yunivesiti na givim bek save long ol yangpela manmeri.

"Na tu ol manmeri husat i pinisim PhD i save kisim moa save long givim edvais long gavman na mekim planti gutpela samting long kantri," Dokta Yala i tok.

Em i mekim dispela toktok las wik Fonde long Pot Mosbi taim NRI i lonsim wanpela ripot bilong politikel gavanens na sevis diliveri.

"Dispela kantri i sot long save manmeri husat i pinisim PhD digri. Yumi nidim planti manmeri wantaim PhD digri bikos haf populesen bilong PNG i no save long rit na rait," Dokta Yala i tok.

Oi manmeri husat i gat PhD i save mekim planti risets wok. Ol risets wok ol i save mekim i save kamapim polisi bilong strongim kantri long gro na kamapim gutpela sosaeti we olgeta manmeri i ken amamas long stap.

"Namba bilong ol manmeri husat i gat PhD digri i wok long go daun. Sampela i wok long go wok long narapela kantri," em i tok.



Memba bilong Gumine na Edukesen Minista, Nick Kuman i sanap wantaim ol polis gat long taim em i go givim ol rilif saplai rais long ol pipel bilong Digine LLG long Sul Maule, Gumine Distrik las wik. *Poto: Ennio Kuble.*

Thank you **BSP!**

“BSP Home Loan helped us to purchase our first house. Our son now has his own room. We have our own kitchen and a whole yard to host a family Kaikai.”

David Jonah
First Home Buyer



A range of home loan products for first home buyers and existing home owners.

 FIRST HOME OWNERSHIP	 HOME LOAN
1. Maximum Loan K400,000	1. Flexible Loan Amount
2. Interest Rate 4% pa	2. Interest Rate 8.45% pa
3. Maximum Term 40 years	3. Maximum Term 25 years
4. Equity 10%	4. Equity 30%



320 1212 / 7030 1212 - 24/7
 servicebsp@bsp.com.pg
 www.bsp.com.pg   



Australia na PNG i strongim agrimen long Torres Strait

Esther Bralyn Wani i raitim
 PAPUA Niugini na Australia i go het long strongim Torres Strait Triti na ol i selebretim dispela 30 aniveseri bilong agrimen long Airways Hotel, insait long Pot Mosbi long Fonde las wik.

Minista bilong Foren Afes, Rimbink Pato, wantaim Minista bilong Intenesenel Developmen na Pasifik bilong Australia, Steve Ciobo i bin stap insait

long dispela selebresen.

“Dispela em i narapela kain na bikpela bung bilong yumi olgeta, Australia na PNG i gat wanpela kain wok pren long histori, gavman, na ol pipel. Long dispela agrimen we ol i bin kamap wantaim, yupela (Australia) i kamap trupela piksa long menesim dispela rilesensip long boda na em i kamap gut tru,” Minista Pato i tok.

Long wankain taim, Mista

Ciobo i tok tenkyu long Minista Pato long tok welkam long em i kam long PNG, na em i namba wan taim bilong em long kam raun long dispela kantri.

“Bilaterel rilesensip namel long Australia na PNG i kamap strong na i go strong yet. Dispela bung em long selebretim triti o agrimen namel long PNG na Australia na ol pipel long tupela kantri wantaim,” Mista Ciobo i tok.



Ol meri bilong Torres Strait i bilas long makim 30 yia bilong Torres Strait Triti.

Nu Ailan Provinsal Gavman givim wara ...Helpim lain i kisim taim long bikpela san

Ahimsa Kibikibi I raitim

GAVMAN bilong Nu Ailan i yusim olgeta rot long kisim wara i go long ol pipel long ples husat i kisim taim bihain long dispela longpela taim bilong san.

Gavman i yusim kar, sip na balus stat long wiken i pinis, long kisim 132 kes wara i go long ol liklik ailan.

Ol 30 bilong dispela kes wara i go long Emirau ailan, we i no gat gutpela hap long kisim wara bilong kuk na dring. Casa balus bilong PNGDF i bin karim i go long Sande.

Gavana Sir Julius Chan i tok oraitim 2 pla fast bots long karim wara igo long ol ailan long Lovongai LLG.

Tupla narapla LLG we i kisim bikpla taim long displa longpla taim san i sanap, em long Tikana na tu Sentral long bik ailan blong Niu Ailan.

NBPOL kampani bai halivim ol hap long kisim wara na go pulumapim ol tank we i sanap nating insait long ol ples behainim haiwei.

Gavana itok sapos yumi no nap long saveim ol liklik lain husat i stap long taim blong nid – yumi noken kolim yumi yet gavman blong pipol.

Em itok ol strongpla taim olsem yumi mas prei hat, halivim wanpla narapla na soim olsem yumi yet i ken halivim yumi yet taim yumi wokabaut long kisim autonomi na tu behainim rot blong sanap long strong blong yumi yet.

Displa longpla san i mekim wara i sot.

Gavman nau i mekim samting long traim stretim tasol bikpla askim long nesanel disasta ofis long salim kontayna long holim wara ino gat bekim yet long en.

San i sanap olsem 4 mun nau -i bin gat liklik ren tasol namel inap nau.



CASA balus long Kavieng airport –ol i halivim long karim wara i go long ailan long Emirau ailan.



SUPREME COURT OF JUSTICE NATIONAL COURT OF JUSTICE OFFICE OF THE REGISTRAR

SUPREME COURT BUILDING WAIGANI

Po Box 7018 Boroko, NCD, Papua New Guinea

iaugerea@pngjudiciary.gov.pg

Date modified Tuesday, 6 October 2015

Ph. 675 3245868/818

Fax: 675 3257732

Ext 5829

Date created, Tuesday, 6 October 2015

PUBLIC NOTICE

Pursuant to Practice Note 1of 2015,the Registrar has compiled an inaugural Fast Track List.

The purpose of this Fast Track list is to "put in place a process to fast track the hearing and determination of certain cases before the National and Supreme Courts in which time is of essence and an expedited hearing and determination of the dispute is necessary in order to maintain the purpose and utility of these proceedings".

These cases fall into the following categories;

- 1 Cases involving election or appointment of persons to public offices for fixed term;
- 2 Civil and Commercial Cases involving fixed term contracts for provision of goods and services or goods of a perishable nature;
- 3 Civil and Criminal cases involving cases of public interest and /or the due administration of justice of which by reason of delay, there is a real risk of loss of witnesses or evidence, or real risk that proceeds of crime may be lost or perish, or that the purpose and utility of the proceedings will have been lost by the passage of time and injustice caused to parties;
- 4 Disputes involving interpretation and application of provisions of Constitutional Law;
- 5 Appeals and Reviews in which delay will cause irreversible harm, hardship and Joss to the parties;
- 6 Civil cases involving imminent and irreversible destruction of the environment; and
- 7 Cases that are part- heard and delayed for more than 12 months, the continued delay of which will defeat the purpose of litigation and cause hardship to parties.

The types of expedited hearing include the following;

- 1 Expedited directions hearing for hearing of interlocutory matters;
- 2 Expedited directions hearing for trial / hearing of substantive matter;
- 3 Expedited Trial/Hearing of substantive matter;
- 4 Expedited completion of part-heard trial/hearing;
- 5 Review of conditions of Order/Direction issued previously;
- 6 Summary Determination;
- 7 Other actions (to be specified, for example review of interim stay orders, review of bail, etc.)

Inaugural Case Fast Track List:

The Registrar has compiled a list of cases before the Supreme Court and the National Court that fall into the categories outlined above. This Case Fast List is available to be collected by the parties or their lawyers or can be supplied on request via e-mail or fax. A copy of the list is also posted in the Court Notice Board at Waigani.

Call Over

On 19th October at 930 amat Waigani the Registrar will conduct a call over of all matters on the Case Fast track

List to consult with the parties on the case list before the case list is submitted to the Court to commence formal court fast track proceedings. Lawyers and parties having interest in any of these cases should consult the Registrar to obtain the case list from the Registrar beforehand and attend the Call Over to be consulted.

Enquiries and List

All queries should be made to the Registrar by email; iaugerea@pngjudiciary.gov.pg or by fax on 3257732 or through the Telephone Nos;3245868 or 3245818,or appointment at the WaiganiRegistry.

Dated 6th October 2015

Ian V Augerea
 Registrar, National & Supreme Courts



PIH Saveman Nius

"I kam long Pacific International Hospital Port Moresby"

Ph: 311 3000 and 799 88000 Textline 7155 8866 Website: www.pih.com.pg

The threat of Brain Attack!

Definitely when a relative suffers a stroke, it is a major emergency and all tambu around the patient will strive to get the ambulance to pick-up the patient. The Pacific International Hospital of Port Moresby has a 24/7 Emergency Room, and our doctors of the Emergency Room provided the information below so that the family of a stroke patient could tell if it is a stroke he or she is undergoing.



Doing regular exercise can help prevent one from becoming a stroke patient as above pictures tell the story.

alcohol intake, eat a low-fat healthy diet, keep to an ideal weight and have regular exercise.

If you have been found to have hardening of the arteries to the brain, you may be advised to have tablets to prevent blood clots (thrombosis) forming. Aspirin can do this, and only a small dose is needed. Garlic tablets are reported to prevent clots, and special blood-thinning tablets called *anti-coagulants* (commonly warfarin) can be prescribed.

What is the treatment for stroke?

It is important to call an ambulance and get to a stroke unit as soon as possible. Follow the FAST rule:

- F = facial weakness (ask the person to smile)
- A = move arms (raise both arms)
- S = speech (speak a simple sentence)
- T = time – act quick if there is a problem with any or all of the above.

An injection within 3 hours may dissolve a blood clot.

Intense rehabilitation to get limbs and speech working again is important. Ideally physiotherapy should be commenced in the first 2 days.

Pacific International Hospital has already received a number of stroke cases this year at its new 3-Mile facility.

According to Dr. Ronnie Koli of PIH ER, there are at least 4 days each week that a new stroke patient is admitted to PIH ER.

PIH also has the laboratory facilities to check precisely your blood cholesterol and also diabetes. And of course, our emergency room is always on the ready.

What is a stroke?

A stroke, also called a "brain attack", occurs when an area of the brain is damaged following interruption to its blood supply. This results in deterioration of the mental and physical functions controlled by that particular area.

What is the cause?

- There are three main causes:
- Thrombosis** – a clot forming in the artery to the area
 - Embolus** – a small clot from elsewhere blocking the artery
 - Haemorrhage** -- bleeding into the brain (unlike the others, where the artery is blocked)
- The risk factors for stroke are:
- High blood pressure
 - High Cholesterol
 - Diabetes
 - Smoking
 - Heart Disease

What are the symptoms?

The symptoms depend on the area of the brain affected and the cause. A haemorrhage usually has a sudden onset and a less favourable outlook. Sometimes a stroke is mild and the effects pass off in a day or so.

- Symptoms include:
- Unconsciousness
 - Confusion
 - Loss of power of speech
 - Loss of movement of the part of the body (e.g. on one side of the body)
 - Double or blurred vision
 - Difficulty understanding questions
 - Headache
 - Dizziness
 - Difficulty walking or using arms
 - Numbness or a weak feeling on one side of the body (face, arm or leg)

How common are strokes?

They are very common, espe-

cially in people over 65 years and more so in males. In Western countries they are the third most common cause of death and after heart attacks the second most common cause of sudden death. Those at special risk are those with high blood pressure, diabetes or high blood cholesterol and heavy smokers.

How can strokes be prevented?

The risk factors need to be checked, especially high blood pressure and cholesterol, which must be kept under control. Other things to do are to avoid smoking, avoid excessive

"Last day today! World Heart Day Promo"

GET HEART-SMART AT PIH! "GOOD ONLY UNTIL OCTOBER 15!"

GET A HEART CHECKUP FOR 100 Kina* ONLY

- Doctor Consultation
- ECG
- Cholesterol Check
- Blood Pressure Check
- Height and Weight Check

Call 7029 6170
or text 7155 8866



40% DISCOUNT ON ANGIOGRAM

Polis Komisina i kisim bek ol risev polis

POLIS Komisina i kamap wantaim wanpela disisen long kisim bek ol Polis Risev bilong Royal Papua Niugini Konstabulari (RPNGC).

Em i mekim dispela disisen long wanpela bung wantaim ol man i makim gavman na ol praivet sekta ogenaisesen husat i gat memorandam bilong andastending (MOU) bilong ol Risev Polis Yunit o husat i laik go insait wantaim RPNGC.

Dispela hap bilong Polis Risev long RPNGC i bin stop long 2008 bihain long planti ol bagarap na pait i kamap. Tasol, dispela em i

wanpela rekomendesen bilong Polis Edministretiv Riviu Ripot.

Tasol, Komisina Baki i tok ol pasin long kantri long sait bilong lo i mekim na bai gat ol polis risev bilong Konstabulari nau.

“Nau mipela i gat 6,000 moa polis man na meri long kantri. Long bihainim namba bilong Yunaitet Nesen mipela mas kisim dispela namba i go antap long 18,000 we bai mipela i mas gat 12, 000 moa memba. Mani bilong mipela long baset i no inap na spes bilong Polis Rikrut Trening Kolis long Bomana i ken kisim

olsem 1, 000 man na meri long wanpela yia.

Long kisim ol Polis Risev em i gutpela rot na mi ting bai pulapim dispela spes. Mi laik stretim gut dispela lo na oda pasin long kantri wantaim ol nupela ol polis risev o aninit long MOU wantaim ol gavman na praivet ogenaisesen,” Komisina Baki i tok.

Tasol, long ol nogut pasin i bin kamap pastaim bai i gat ol strongpela lo i stap. Olgeta risev polis i mas ripot long Provinsal Polis Komanda o Metropolitan Suprintenden long provins na soim wanpela CV na wanpela leta i

soim olsem ol i wok long employa bilong ol.

Ol i no inap kisim ol polis i no save wok. Bai ol i no inap baim ol na bai ol volantia tasol. Olgeta risev polis mas wok 8-pela awa insait long wanpela wik bilong RPNGC.

Long ol institusen, ol i mas raitim MOU namel long RPNGC na ol pati i wanbel long stat bilong Risev Polis Yunit long ogenaisesen.

“Dispela em long luksave olsem i gat planti polis man na meri i stap long lukautim na helpim ol pipel long PNG,” Komisina Baki i tok.

Promosen long ol opisa i kamap asisten komisina

POLIS Komisina Gari Baki long las wik Fraide i tok orait long ol rekomendesen bilong Polis Promosen Seleksen Bot bilong 2015 long ol komisin polis i kamap asisten komisina.

“Mi amamas long tokaut olsem wanpela bilong ol dispela i kisim promosen em Joanne Clarkson, wanpela sinia polis meri long Konstabulari husat i kisim promosen long Sif Suprintenden i kamap Asisten Komisina bilong Polis. Dispela em i bikpela posisen we wanpela meri i kisim long 1976,” Komisina Baki i tok.

Polis Promosen Seleksen Bot i toktok long 13 ACP posisen, 7-pela i stap pinis na 6-pela i nupela. Ol polis i kamap asisten



Polis Komisina Gari Baki

komisina em; Sif Suprintenden (CSP) Anthon Billie i go long ACP Niugini Ailan, CSP Peter Guinness long ACP Momase, CSP Tony Duwang long ACP Lojistiks, CSP David Manning long ACP Operesen, CSP Tony Duwang long ACP Lojistiks na Deputi Sif bilong Bogenvil Polis Sevis.

Lista i go moa olsem

Raphael Huafolo long ACP ol Kraim, CSP Sylvester Kalaut long ACP NCD, CSP Iven Lakatani long ACP HR, CSP Nema Mondiai long ACP Hailans, Isten Koman, CSP Donald Yamasombi long ACP APEC na CSP Jerry Frank long ACP Trefik.

Komisina Baki i opim nupela ACP long Fonde, Oktoba 2015.

Polis Promosen Seleksen Bot bai bung long Novemba 2015 long lukim ol aplikesen bilong promosen long Konstebel i go long Sif Suprintenden.

Ol Polis Promosen Seleksen Bot memba em Reveren Sommy Setu (Siaman), Francis Tokura (Sif bilong Bogenvil Polis Sevis), na ACP Allan Kundi (ACP Sauten).



Ol 20 kg beg rais i stap redi long go long ol pipel long Boromil long givim aut long Kumai-Bomai LLG. Foto: Ennio Kuble

Moa long 7000 rais beg i go long Gumine distrik

Ennio Kuble i raitim

MEMBA bilong Gumine na Minista bilong Edukesen, Nick Kuman wantaim patnasip bilong Lokal Level Gavman long Gumine, i bin givim 7,400 20kg beg rais long ol pipel bilong Gumine Distrik insait long 45 kaunsil wod long las wik.

Ol beg rais em bilong helpim ol pipel husat i bin kisim taim stret long no gat kaikai taim drai sisen o strongpela san i bin kilim i dai olgeta kaikai long gaden, wankain olsem long ol narapela hap bilong kantri.

“Olgeta pipel i mas tingting gut olsem distrik i no yusim DSIP mani long wokim dispela rilif wok. Ol distrik fans i bin go daun long wokim ol projek long 2015 baset long dispela hap. Helpim bilong taim nogut em i kost K600, 000 long mani we mi kisim i kam long wok bilong mi wantaim bisnis sekta na opis bilong Praim Minista,” Mista Kuman i tok.

Mista Kuman i tok moa olsem ol dispela kaikai i kost K500, 000 na narapela hap mani bai ol i yusim bihain. Kost bilong transpot i go long ol ples long bus em LLG yet bai baim bikos ol yet i lukautim wok bilong givim aut ol kaikai.

Mista Kuman i toktok long Fraide las wik long ol pipel i mas no ken wansait long givim ol kaikai. Olgeta pipel long ol ples i mas kisim wankain mak inap long olgeta. Em i givim sampela toktok tu long wanem kain wei bai ol pipel inap long lukautim ol yet long bihain taim sapos kain hevi bilong longpela taim drai sisen i kamap olsem gen.

Em i tok, ol pipel bilong Digne na Kumani-Bomai LLGs i gat 12 kaunsil wod tasol sampela wod em i bikpela moa long ol narapela olsem na ol LLG presiden wantaim ol kaunsil i mas tingting long wanem kain sais na namba bilong ol pipel long wan wan wod taim ol i givim ol kaikai. Dispela tupela wod i bin kisim 2,000 beg rais long wan wan bilong ol.

Gumine LLG yet i gat 21 wod na ol i bin kisim 3,500 beg rais long givim aut long ol wod.

Mista Kuman i tok dispela drai sisen i stap longpela taim tumas nau na bagarapim ol pipel tasol em i no nupela samting. Em i tok long 1970 ol i bin gat wankain taim bilong san i stap longpela taim na i bagarapim ol wara, bus na gaden. Narapela taim em long 1980 na bihain long 1997 we ol pipel i bin singaut long helpim na em yet i bin helpim ol Golin pipel wantaim beg rais tasol olsem wanpela praivet man tasol, em i no bin isi.

Mista Kuman i tokim ol pipel olsem dispela taim bilong drai sisen i bagarapim 8 milien pipel bilong PNG na ol pipel bilong Simbu, Gumine na Gembogl distrik i bin kisim bikpela taim tru.

Lukaut long ol plastik doli doli

Sape Metta i raitim

LUKAUT ...ol doli doli i ken kamapim hevi bilong paia long ol haus, sapos ol man, meri na pikinini i no was gut olsem Hayden Metta i painim aut long wik i go pinis.

Metta husat i save i stap wantaim famili bilong em long Kamkumung viles long Lae, Morobe provins i tokim *Wantok Nius* olsem long traipela moning long samting olsem 3 kilok long Tunde wik i go pinis, em wantaim meri bilong em Jayne na 6-pela yangpela pikinini bilong tupela i kirap na sekim ol kona bilong haus bilong ol. Bihain ol i luksave olsem smok i kirap na raunim rum i wok long kamap long wanpela kona bilong rum. Na ol i kilim dai paia na stopim smok insait long rum.

Bihain ol i sekim gut we paia i bin kirap long em na painim aut olsem dispela paia i bin stat long wanpela plastik dolidoli em i save wok long batri.

Metta i tok taim em i lukluk long dispela dolidoli bel bilong em i kirap, long wanem, em i ting ting i go bek long



Ol plastik dolidoli wankain olsem long piksa i gat bateri i ken kamapim bagarap.

ol haus i save paia. “Dispela dolidoli i mekim na mi kisim tingting olsem planti taim – taim ol haus i save paia, ol manmeri na ol lain long atoriti i save sutim tok i go long pawa feilia, kendel, ges na paia bilong haus kuk,” Metta i tok.

Em i mekim strongpela tok i go long ol lain olsem ICCC na ol arapela ejensi long stopim ol kain kain dolidoli kam insait long PNG, long wanem,

dispela ol dolidoli bai i ken kamapim paia na kukim haus.

Metta i tok ol faktori husat i save wokim ol dolidoli I laik kisim mani tasol, ol I no tingting long seifti bilong manmeri na pikinini.

“Sapos ol i no gat tingting long seifti bilong yumi orait yumi mas stopim ol oda long bringim dispela kain kain samting i kam long kantri we i ken bringim hevi tu long yumi,” Metta i tok.

Ripot i kam long Polis Yunit

Wanpela man i katim nek bilong narapela - Hailans Koman -EHP

DISPELA hevi i kamap long Tunde long 29 Septemba, long dispela yia long 12 klok long san insait long Avaniil viles long Henganofi.

Ol i ripot olsem wanpela saspek i katim nek bilong narapela man, Atefo Risio, wantaim bus naip bihain long tupela i kros pait long graun.

Ol i ripot long polis na ol polis i go yet long mekim wok painim aut na ol i no holim wanpela yet.

Ol raskol i holim teksu draiva – NCD

OL 6-pela saspek i holim wanpela teksu opereta, John Thomas, long Septemba 16 long 7 klok nait insait long Erima Setelmen long Nesenel Kapitot Distrik (NCD).

John Thomas husat i komplem i ripot olsem 6-pela saspek i holim em wantaim ol bus naip. Ol i rausim K180.00 na kisim teksu bilong em.

Wanpela saspek ol i holim em long Boroko Polis kalabus na em i wet long sanap long kot.

Wanpela man i bagarapim narapela – Hailans Koman-Jiwaka

INSAIT long Taimel viles long Minj, wanpela man husat i kisim bagarap, Roben Opo, i ripot olsem saspek, Lessel Maro Margen, i katim em planti taim wantaim bus naip na nogat as bilong en.

Dispela trabel i kamap long Septemba 26 long 4.30 long apinun. Long dispela hevi, Roben i kisim bikpela bagarap long naip i katim em long rait lek bilong em.

Ol i ripot long polis tasol ol polis i no holim wanpela yet na ol polis i go het long mekim wok painim aut.

Hailans rijon i statim awenes long stil pasin long eksem

HAILANS rijon i statim awenes bung long stil pasin i save kamap long taim bilong eksem long daunim dispela pasin long Hailans.

Eksem i save givim sans long ol sumatin long kisim gutpela save na go het long bikpela level bilong edukesen na gat gutpela sindaun long bihain.

"I bin gat sampela stil pasin long taim bilong eksem. Dipatmen bilong Edukesen i wari long dispela stil pasin na ol i lukluk long kamap

wantaim ol plen long toktok long dispela," Ekting Seketeri bilong Edukesen, Dokta Uke Kombra i tok.

Dokta Kombra i mekim dispela toktok taim em i opim dispela awenes bung bilong Hailans rijon we i bin kamap long Maun Hagen long las wik Mande.

Ol Provinsal Edukesen Edvaisa, ol Stended Opisa, ol Provinsal Eksemnesen Supavaisa, ol pipel i makim sios, ol komyuniti lida na ol opisa bilong Dipatmen bilong

Edukesen i stap insait long dispela awenes bung.

As bilong dispela bung em long ol pipel bai go pas long eksem long gat ol plen long helpim na monitorin na lukautim eksem long narapela tripela wik we i stat long Mande. Wankain awenes bai kamap long narapela tripela rijon long neks yia.

"Mi bilip olsem ol dispela pipel bai senisim dispela pasin na bai nogat stil pasin long taim bilong eksem long Hailans rijon. Mipela i

ken kamapim senis sapos mipela i statim awenes nau," Dokta Kombra i tok.

"Olgeta pipel long kantri i mas pilim olsem em i wok bilong ol long karim aut dispela awenes long Nesenel, Provinsal, Komyuniti na skul level long stopim stil pasin long eksem.

Ol pikinini bilong mipela i lukluk stap. Ol papamama tu i gat bikpela bilip long ol pikinini bilong ol long mekim gut. Yumi mas mekim wankain long olgeta. Ol bekim

bilong stil long eksem i bikpela.

Husat sumatin i stil long eksem bai i no inap kisim setifiket. Wankain bai kamap sapos skul i mekim stil pasin long eksem bai olgeta sumatin i no inap kisim setifiket," Dokta Uke i tok.

Dokta Kombra i givim tok lukaut olsem sampela save tingting long mekim mani na ol i save giaman na salim ol ensa pepa. Em i tok ol pipel i mas save olsem ol ensa pepa ol i save mekim bihain long eksem i pinis.



Ol sumatin long DWU i mekim presentesen bilong ol long Infomesen Sistem.

DWU i opim tupela bung

DIWAIN Wot Yunivesiti (DWU) i opim tupela bung long skul bilong ol we i givim ol sumatin na ol woklain sans long skelim ol risets na ol akedemik projek wantaim yunivesiti komyuniti na pablik long las wik Fraide.

Fekalti bilong Ats na Sosal Sains (FASS) i holim namba wan Risets Simposium o bung long SVDMA Oditorium taim Infomesen Sistem Dipatmen long Fekalti bilong Bisnis na Infomatiks i holim namba 10 Infomesen Sistem (IS) Simposium long Sir Peter Barter Oditorium.

As bilong dispela FASS bung em long helpim ol long mekim risets na givim sans long ol fainel yia sumatin husat i mekim gut long wokim presentesen bilong ol long pablik.

Ol IS simposium i makim long givim strong long ol fainel yia sumatin long presentim ol risal bilong ol developmen projek olsem hap bilong fainel yia digri.

Het tok bilong IS simposium em long: "Core values and research underpins our search for quality solutions in Information Systems and Technological advancements" we ol i kisim long het tok bilong akedemik yia bilong yunivesiti "Core values and research underpin our search for quality" na ol FASS i nogat het tok long dispela yia bikos long planti het tok bilong ol risets.

Tupela bung i bin kisim ol ges spika long ol industri we FASS i kisim ol pipel i makim New Guinea Binatang Risets Senta long toktok na IS i kisim Telikom

PNG.

FASS i holim wanpela panel diskasen namel long tripela dipatmen em Komyunikesen Ats, Sosal na Rilijes Stadis na PNG Stadis na presentesen bilong SI i kamap long gavman na non-gavman industri.

FASS bung i tingim wanpela antropolojiks, Nancy Sullivan, husat i dai pinis long mekim planti wok bilong en long risets long PNG long Madang insait long ol buk em i kamapim wantaim ol woklain long DWU.

Cisco Systems i luksave long DWU olsem Cisco Akademi long wanem ol Infomesen Sistem sumatin bai greduet neks yia wantaim luksave long wok aninit long sponsa bilong Melbon Institut bilong Teknoloji (RMIT).

UPNG i lonsim nupela mani

Esther Bralyn Wani i raitim

YUNIVESITI bilong Papua Niugini (UPNG) i lonsim nupela K5 na K2 koin wantaim ol stem bilong ol long makim 50 Golden Jubili bilong skul.

Minista bilong Haia Edukesen, Sains Risets na Teknoloji, Malakai Tabar, Dairekta bilong Post PNG, Mista Banian, Gavana bilong Sentral Benk, Loi Bakani, Vais Sensela bilong UPNG, Profesa Albert Mellam na Sensela bilong UPNG, Dokta Nicholas Mann i bin stap insait long dispela opening.

'Dispela bung em long rausim tupela koin ol i bin wokim wantaim Benk bilong Papua Niugini long makim Golden Jubili bilong yunivesiti. Golden Jubili bilong mipela i makim 50 yia bilong Lidasip long Haia Edukesen long Papua Niugini na Pasifik rijon,' Sensela bilong UPNG, Dokta Nicholas Mann i tok.

Em i tok yunivesiti bilong PNG i save gat driman long kamap Primia Yunivesiti long kamap gutpela akedemik na givim kwaliti edukesen, risets na sevis long Papua Niugini na Pasifik rijon.

Dokta Mann i tok long dispela driman, long 50 yia em i karimaut gutpela edukesen na ol wok bilong risets long bildim kantri na go aut long wol na kamap gutpela sosaiti.



Ol nupela K2 na K5 wantaim ol stem i makim 50 yia Golden Jubili bilong UPNG.

Em i tok ol dispela gutpela ol samting i kamap inap long 1965. Em i tok dispela bikpela yunivesiti i kamapim 30, 000 greduet husat em ol lida olsem ol Gavana Jenerel, ol Praim Minista, ol Gavana long provins, ol Minista long kantri, ol komisina, ol akedemik na ol

saintis tasol em i no kamapim wanpela enjinia. Long wankain taim, em i tok dispela yia i kamap gutpela yia tru long ol developmen i kamap we Yunivesiti i holim XV Pasifik Gems Viles na hap bilong kaikai, bilding bilong skul bilong ol ol sumatin i laik pinis, Sains 4

bilding i stap long konstraksen na haus bilong ol woklain long Skul bilong Medisin na Helt Sains i pinis.

'Dispela Golden Jubili yia bai ol i tingim long ol dispela gutpela samting i kamap long dispela yia,' Dokta Mann i tok.

K69 milien long TFF i go long ol skul

EDUKESEN Dipatmen i baim K69 milien Tuisen Fi Fri (TFF) mani i go long ol skul long dispela wik.

Ol skul na ol bot aninit long Nesenel Edukesen Sistem i mas save olsem Dipatmen bilong Edukesen i baim narapela hap bilong TFF mani long dispela wik.

Dipatmen i baim K69 milien i go long 10,063 skul na ol institusen long helpim 1.9 milien sumatin long elementri inap long vokesenel senta, Fleksibel Open na Distens Edukesen na Inklusiv Edukesen Risos Senta.

Ol nupela hai skul i rejista pinis wantaim ol Pemitid Skul bai kisim tu TFF mani bilong ol neks wik.

Dispela mani mak i kisim total TFF pemen long ol skul i kamap K567,144,700.00. Total mani em K605 milien.

TFF i bin kamap long tupela pemen. Pemen 1 bilong Tem 1 na 2, Pemen 3 bilong Tem 3 na 4. Pemen bilong K69 milien i karamapim ol pemen ol i no bin baim long Pemen 2.

Dispela pemen inap long ranim skul inap long Tem 4 na taim bilong fainel eksem.

Edukesen Seketeri, Uke Kombra, i laikim olgeta het tisa na ol prinsipel bilong ol skul wantaim ol bot bilong skul long yusim mani gut long luksave olsem eksem i kamap gut.

Dokta Kombra i tok tenkyu long nesenel gavman long go het na sapotim ol skul long op na kisim gutpela edukesen.

Ol meri i gat nem long stap

strong

Esther Bralyn Wani
i raitim

“OL meri long Papua Niugini (PNG) i gat nem long stap strong, i gat strong na save long hariap na painim rot long abrusim taim nogut na kirap gen taim ol i bungim hevi,” Minista bilong Intanesenel Developmen na Pasifik, Steven Ciobo i tok.

Minista Ciobo i mekim dispela toktok long Wimen insait long Lidasip Konpresns i bin kamap las wik Fraide long Pot Mosbi.

Ol meri menesa long PNG i stap long dispela Pasifik Lidasip na Gavanens Prisin long toktok em, Kantri Menesa bilong Orijin Energy PNG Lesieli Taviri, Eksekyutiv Menesa bilong The Voice Inc Serena Sumanop, Din bilong Yunivesiti bilong Papua Niugini (UPNG) Skul bilong Humanitis Betty Lovai, Komisina bilong PNG Intanel Reveiniu Atoriti, Betty Palaso.

“Ol meri long PNG i mas kisim

sapot long gat olgeta strong long gat rot long ol egrikalsa risos, fainens na seving na fri long vailens. Ol meri i mas kisim strong long kamap lida. Ol i mas gat toktok long bisnis, politiks, edukesen, long famili bilong ol, na long ol komyuniti bilong ol,” Minista Ciobo i tok.

Em i tok olsem long invest long ol meri em i no wanpela gutpela sosol polisi, em i gutpela ikonik polisi. Em i tok dispela i gat bikpela mak long pro-

daktiviti, mekim planti wok gut na bikpela senis na developmen.

Minista Ciobo i tok, “Mipela i givim strong long ol meri na long li-

dasip em rot bilong kisim ol dispela gol.”

Em i tok long dispela ol helpim program bilong ol i save gat bikpela

luksave long jenda ikwaliti na givim strong long ol meri long ikonik.



Minista Steven Ciobo wantaim ol meri menesa long dispela Wimen insait long Lidasip Konpresns.

Ol pikinini meri i kisim luksave

INTANESANEL de bilong ol liklik meri i bin kamap long Oktoba 11 long makim strong bilong ol liklik meri i ken senisim wol.

Long 2030 Ajenda bilong Sastenebel Developmen long las mun bai gat luksave long rait bilong ol liklik meri we olgeta intanesenel komyuniti i amamas na wanbel long dispela.

Dispela nupela ajenda i luksave long bikpela lukluk i kamap long helt na gutpela sindaun bilong ol liklik meri, olsem ol seksuel na riprodaktiv helt bilong ol we i wanpela nid long gutpela sindaun bilong ol.

Planti gutpela samting i kamap tasol ol liklik meri i save kisim bagarap long planti ol nogut samting olsem diskriminasi na lusim ol aut long ol toktok bikos ol i liklik na ol i meri. Long planti ol liklik meri taim gro bilong ol i senis na ol i kamap yangpela meri, ol i save lukim planti ol pasin i no ikwal o wankain. Em i save makim wanpela hap we ol pipel mas lukautim ol gut sapos yumi laik lukim jenda ikwalati.

Luksave long ol liklik meri long yusim ol rait bilong ol, go long skul na gat ol save long wok em i impoten long gutpela sindaun bilong ol. Em i gutpela stat long helt bilong ol na gutpela bilong ol famili bilong ol, ol komyuniti na kantri. Ol dispela rait em long makim husat long maritim na long marit long wanem taim, wanem taim long

gat pikinini o laik gat pikinini o nogat, na stap fri long vailens, kisim bagarap na yusim ol.

Taim ol liklik meri i gat rait long skelim laip bilong ol yet ol i bai amamas long ol rait bilong ol. Ol i no inap amamas long gutpela helt na gutpela ol pikinini tasol, ol bai inap long givim long developmen bilong kantri olsem ol ikonik na ol bisnis meri.

Long go het, yumi mas wok strong long daunim marit taim ol i gat bel, bagarapim ol sem bilong ol meri, na ol nogut pasin kastom i bagarapim ol meri. Yumi mas givim ol rot bilong kisim seksuel edukesen, rausim ol lo i pasim ol rot bilong ol long infomesen, ol sevis na ol disisen.

Givim ol liklik meri ol gutpela helt sevis olsem long karim pikinini na bikpela samting long larim ol stap long skul, sapos ol i stap long bus ples o long taun, ol i gat bel o nogat, ol i marit o yangpela ol i mas stap long skul.

Long UNFPA, long 2030 Ajenda bai ol i no ken lusim wanpela bihain bai i kamap gut sapos ol i bildim wanpela wol we ol liklik meri i no stop bilong bihainim driman bilong ol, ol yangpela meri i gat rot bilong kisim infomesen long seksuel na riprodaktiv helt na ol sevis.

Wanpela wol we olgeta liklik meri i skul na i save long lukautim em yet long helt na ol pipel i ken rispektim em na em i gat wankain raits olsem ol mangi.

Mama i gat ol pikinini i gro wantaim Flame na kantri

MISIS Albert Wonol em i gutpela piksa bilong wanem ol samting i mekim PNG wanpela bikpela kantri. Em i wanpela meri husat i save wok hat, long lukautim 6-pela pikinini i pinisim skul.

Nau ol i wok olsem bisnis eksekutiv, ensinia, dokta, akauntan, na tupela NRL ragbi pilaia i winim skolasip long stadi long yunivesiti long Australia. Misis Albert i save pilim amamas long famili bilong en.

Olsem wanpela mama em i save stap isi na gat pasin bilong lukautim famili. Em i bilong Westen Hailans na i maritim Albert, na muv wantaim man bilong em i go long Sauten Hailans.

Ol i save wok gaden na stap long viles tasol ol i save lusim ples na raun planti bikos long ol pait save kamap long ples.

Long painim mani na helpim ol pikinini bilong em long edukesen bilong ol, Misis Wonol save wok-about planti aua i go long Mendi long baim Flame Flour.

Em i save praim long helpim ol famili bilong em long kaikai na salim long ol weding na ol bikpela selebren.

Em i mekim gut mani, na em i baim wanpela liklik kar long kisim moa flawa long salim namba wan pikinini bilong em husat i gat 35



Promosen piksa bilong Flame Flour i soim strongpela mama. Foto: Flame Flour

krismas nau, i go long yuni-vesiti.

Bihain em i sapotim pikinini i go long post greduet stadi long Australia. Bihainim lek mak bilong bikpela brata bilong ol, olgeta pikinini i go moa long pinisim edukesen bilong en.

Planti yia i go pinis tasol gutpela flawa bilong em i save stap namba wan

kaikai bilong famili yet na em tu i save laik long kukim olgeta taim.

Em i save laik long raun na lukim ol pikinini bilong em long Pot Mosbi, Melben, Solomon Ailan, Sidni na Japan.

Komitmen bilong Misis Wonol long ol pikinini bilong em na givim ol flawa long kaikai i helpim long kamapim tupela PNG ragbi

hero bilong bihain.

“Mi amamas long ol pikinini bilong mi. Mipela i gat sans long groim ol pikinini husat bai kamap gutpela pikinini long bihain.

Givim ol pikinini bilong mi, Flame Flour i helpim ol na givim strong long ol long kamap dokta, ensinia, akauntan, na ol ragbi pilaia. Dispela i mekim mi wanpela amamas mama bilong ol,” Misis Wonol i tok.



Yut, Meri na Famili
Pastor Barbara Lunge

Faipela bikpela tingting bilong Kingdom laip

PAPUA Niugini nau em i kamap olsem wanpela nesen bilong Jisas Kraus husat i stap olsem Bikpela tru long olgeta man i gat bikpela nem na em i King bilong olgeta king. Tok i stap long 1 *Timoti 6:15-16* olsem, "Em bai i kamap long taim God i makim. God em i as bilong pasin tru bilong amamas, na em wanpela tasol i save bosim olgeta samting. Em i King bilong olgeta king, na Bikpela bilong olgeta bikman. Em wanpela tasol i no save dai. Em i stap long bikpela lait tru, na yumi no inap go klostu long em. I no gat wanpela man i bin lukim em, na i no gat wanpela man inap lng lukim em. Olsem na oltaim oltaim yumi olgeta i mas givim biknem long em na em i mas i gat olgeta strong. I tru."

I gat 5-pela bikpela tingting we yumi mas save na bihainim olsem yumi sitisen bilong kingdom.

Namba 1 - Bikpela Tingting em ol tok promis i stap insait long Tok bilong God olsem strongpela graun bilong yumi ken putim bilip strong long en, na i no long putim bilip bilong yumi long wanpela man o wanpela samting we God i kamapim.

"Skai wantaim graun bai i lus, tasol tok bilong mi bai i no inap lus." *Matyu 24:35*. God i save givim gutpela samting long ol lain husat i bilip long Tok bilong em na putim tingting strong long em. "Tasol man i no bilip long God, em i no inap bihainim laik bilng God. Long wanem, man i laik i go klostu long God, em i mas bilip olsem God i stap, na em i mas bilip olsem God i save mekim gut tru long ol man i wok long painim em." *Hibru 11:6*

Namba 2 - Bikpela Tingting em long Litimapim Nem bilong God. Litimapim Nem bilong God na Lotu em i pawa we bai brukim strong bilong satan na ol plen bilong em long bagarapim ol santu na ol wok bilong kingdom. Bihain long Joshua i dai, ol Israel i askim BIKPELA, husat bai go pas na pait wantaim ol pipel bilong Kenan? BIKPELA i bekim na tok. Judah. Mining bilong Judah em i preis o Litimapim Nem bilong God.

Hetman 1:2. Preis i save pasim maus bilong ol birua. "Ol liklik pikinini tu i save litimapim nem bilong gyu. Yu wokim strongpela banis bilong pasim rot bilong ol birua na bilong ol man i save sakim tok bilong yu." *Buk Song 8:2*.

Satan na o plen bilong em bai bagarap, birua bai paol na ol bai pait namel long ol yet. 2 Stori 20.

"Nau bai yu kam na marimari long taun Saion na helpim em. Taim i kamap pinis bilong yu sori long en. Nau tasol em i taim bilong sori." *Buk Song 102:13*. Promosen i save kam long BIKPELA God long heven. Em i save senisim ol taim na sisen. "Yu save bosim taim bilong san na ren, na yu yet yu save mekim ol man i kamap king na us save rausim ol king long wok bilong ol. Na yu givim gutpela tingting na save long ol man." *Daniel 2:21*. Kingdom i senis i go long ol pikinini man. Kingdom bilong graun "Orait namba 7 ensel i winim biugel bilong en, na mi harim ol lain i stap long heven i singaut strong olsem, "Bikpela bilong yumi wantaim dispela man em i makim bilong kisim bek ol manmeri bilong en, tupela i kamap king bilong olgeta hap bilong graun. Na Bikpela bai i stap king oltaim oltaim." *Kamapim Tok Hait 11:15*.

Namba 3 - Bikpela Tingting em i Bel isi. I gat planti hevi, pait na klaimet senis na planti pipel i pret o ol i paol na i no save bai ol i mekim wanem. Tasol Tok bilng God i tok olsem God i givim yu bel isi. "Kingdom bilong God i no pas long kaikai na dring. Nogat. Pasin tru bilong kingdom bilong Godem i stretpela pasin nab el isi na pasin bilng amamas Holi Spirit i save kamapim." *Rom 14:17*.

Namba 4 - Bikpela Tingting em i Promosen. Pawa bilong kisim promosen i senis pinis long indastriel develop kantri i go long ol kantri we i wok long develop yet olsem PNG. "Em i save helpim ol rabisman na ol i no i stap nogut moa. Ol i stap gut tasol. Em i save helpim ol man i sot long ol samting na ol i kisim inap. Em i save putim ol i stap wantaim ol hetman bilong ol manmeri bilong en."

Namba 5 - Bikpela Tingting em Provisen. Ol gutpela samting i dia tumas i wok long senisim ples nau. God i wok long givim mani i go long ol lain long mekim wok bilong gospel.

"Bai mi givim yu ol mani na ol gtuepa samting ol dispela lain i bin haitim long ol ples ol man i no inap lukim, na bai yu save, mi tasol mi Bikpela. Na bai yu save, God bilong Israel tasol i bin kolim nem bilong yu na singautim yu." *Aisaia 45:3* ol mani i stap long han bilong ol man husat i no gat bilip lng God bai kamaut na i go long han bilong ol Kristen long ol bai mekim wok bilong kingdom bisnis bilong God.

"Sapos God i laikim sampela manmeri, orait em i save givim gutpela save na tingting long ol na mekim ol i amamas. Tasol God i no laikim sampela, orait em i save mekim ol i hatwok long bungim planti samting bilong givim long ol manmeri God i laikim. Dispela pasin tu i no gat as bilong en. I olsem man i ran i go bilong holim pas win." *Saveman 2:26*. Yumi mas kisim salens long tanim bel long kain pasin bilong stap hap, hap tasol na yumi mas givim olgeta tingting long mekim wok bilong God wantaim kala!!!

Pinis..
Toksave: Bilong save moa, yu mas ringim mi o raitim pas long dispela adres na fon namba. Barbara Lunge, ROGIM, P.O. Box 3063. Boroko. NCD. o ring long 79638276 o salim email long: lungeb37@gmail.com

Moning taim maket long Ramu NiCo Basamuk



Ol meri bilong Deln ples klostu long Basamuk i salim ol prut na kumu long ol wokman bilong Ramu NiCo arere long Basamuk taun.

James Kila i raitim

MAKET bilong ol mama long ples klostu long Ramu NiCo (MCC)

Basamuk i no save sot long kumu na prut.

Ol meri long ples klostu i save kam na salimplanti prut na kumu olsem

aninit long 'marmar' klostu long rifaineri bilong Ramu NiCo (MCC) Basamuk taun long Coast district, Madang

US strongpela meri awat i redi

YUNAITET Stet (U.S) Embasi i amamas long tokaut olsem ol i kisim ol nominesen bilong 2016 U.S Seketeri bilong Stet strongpela meri awat.

Dispela strongpela meri awat i save amamasim ol meri husat i mekim histori long kantri bilong ol na ol komyuniti insait long wok bilong ol long ol sosaiti bilong ol long daunim diskriminesen o pasin bilong mekim nogut long ol narapela, na helpim long stretim ol vailens.

Ol meri husat i bungim birua long resis long pablik opis o husat i laik brukim ol banis long promotim gutpela senis em ol gat bikpela sans long winim awat. Long dispela yumi ken makim wanpela.

Embeseda North i tok, "Mipela laik selebretim ol wok bilong sampela ol gutpela meri husat i sanap long bihain bilong yumi. Wanpela strongpela meri em i ken meri tisa, wanpela meri save wok long haus sik, wanpela loya, wanpela meri husat i save pait long rait bilong ol pipel. Em i ken wanpela lida long sios, stap insait long



Yunaitet Stet Embeseda North i go pas long awat

bisnis, wanpela meri save pinisim sik, wanpela politik ektivis o meri bilong kamapim belisi. Dispela ol sampela piksa bilong ol strongpela meri husat yu ken makim long 2016 awa."

Ol meri i ken winim dispela awat em ol meri wok long politikel, ol human rait, ikonmik, sosai, judisal, helt, edukesen, pres/midia, pasin bilong belisi na wanbel long nesenel, na saintifik na teknolojikel hap. U.S Embasi bai skelim

ol meri husat i bungim kain kain birua, kisim hat taim, o salensim ol nogut pasin bilong kalsa o kisim tok nogut long promotim wok bilong ol meri na bilong sosaiti bilong ol.

Nominesen bai pinis long Novemba 30 long U.S Embasi long Pot Mosbi.

Taim dispela awat i stat long 2007, Yunaitet Stet i amamasim ol meri husat i bungim hevi long laip bilong ol na i go het long stopim human trefiking,

provins.

Ol meri save kamap long 6 klok moning long salim ol samting long ol wokman na wokmeri bilong main olsem ol Saina husat i save laikim tumas pinat, popo, mau banana, painapel na ol kain kain kumu.

Basamuk em i stap long ketsmen bilong ol bikpela wara i save kam daun long ol maunten bilong Finisterre Range, olsem na strongpela san nau i bagarapim ol narapela hap bilong Madang i no bagarapim ol tais wara bilong ol na kaikai em i orait yet long saplai i go Ramu NiCo haus kuk long Basamuk Rifaineri. Long taim nickel/cobalt divelopa i bin kirapim Basamuk Rifaineri, ol lokal fama i save lukim pes bilong mani olgeta taim.

Na ol i kamapim stail bilong tok resis long prais bilong ol samting tu wantaim ol Saina man long maket bilong kisim gutpela prais stret.

jenda bes vailens, marit taim meri i gat bel, na korapsen.

Dispela awat i save amamasim ol meri ol i bin paitim ol, kalabusim ol, tokim ol olsem bai ol i kilim ol sapos ol i toktok long jastis, ol human rait, konstitusenei rifom, na bihain lo.

U.S Embasi bai makim wanpela meri long wan kantri long Papua Niugini, Solomon Ailan na Vanuatu na bai ol i salim nem bilong ol i go long Wasington DC bilong skelim long Seketeri Intanesenel strongpela meri awat.

Wanpela meri insait long rijon bai ol i makim em long stap insait long wanpela bikpela seremoni na program long Wasington D.C long selebretim Intanesenel De bilong ol Meri long Mas, 2016.

Olsem hap bilong dispela raun i go long Wasington DC, husat i win bai stap insait long tupela wik program long wok bung wantaim ol Amerika meri long U.S na bungim ol lida long strongim ol meri.

PNG Eye Care i luksave long Wol Sait De



Queena Joe (6-pela krismas) i sekim ai bilong en.

Frieda Sila Kana i raitim

PNG Eye Care em i wanpela lokal NGO we i save givim gutpela sevis i no gat bikpela fi long sekim ai bilong ol pipel long komyuniti na long givim ai glas o salim ol lain i gat sik long ai, i go long stretim ai wantaim ol ai dokta o optamolojis.

Long las wik Fonde ol i bin holim wanpela selebren long luksave long dispela wantaim sapot bilong Lions Australia na Lions PNG na Yunivesiti bilong Papua Niugini, Medikel Fekalti Optamolojis dipatmen, long nupela Risos Senta bilong Ai long UPNG Taurama Medikel Fekalti Kempas.

Nesenel Risos Senta bilong Lions Klap bilong PNG na

Queensland i sapotim tripela nupela projek bilong stopim sik bilong ai pas.

Trachoma o sik bilong ai i save kisim ol pikinini taim ol i no save klinim ai bilong ol na sik i save go strongim ai lid bilong ol. Long PNG dispela sik i save kamap long binatang ol i kolim chlamydia we i save kamap long ol pikinini.

Sampela taim dispela sik i save kamap long san, smok bilong paia, strongpela san tumas long taim ol man i go painim pis olgeta taim, sik daiabitis olsem.

Profesa John Vince bilong UPNG Medikel Fekalti i bin makim maus bilong Dean bilong Medikel Fekaltu, Profesa Tefuaranu na em i bin tok welkam long ol sumatin bilong Kaugere Praimeri Skul na PNG Blain Skul

wantaim Ambasad Walter North bilong Yunaitet Stets Embesi long PNG.

PNG Eye Care i bin singautim UPNG Skul bilong Stopim Ai long Bagarap na bos bilong dispela skul, Dokta Jambi i bin mekim sampela toktok long ol sumatin na ol lain i kamap long dispela taim.

Em i tokaut long astingting bilong Wol Ai Sait De olsem bikpela toktok bilong dispela de em "Ai Ke bilong Olgeta".

Yunaitet Stet Embesi i givim US\$107,000 long PNG Eye Care bai mekim wok bilong sekim ol ai bilong ol pikinini long skul. Na long dispela de ol i bin statim wantaim ol pikinini long Kaugere Praimeri skul na long PNG Skul bilong ol Ai pas.

PNG Eye Care kirapim Nupela Risos Senta bilong Skul bilong Ai Baragap

Frieda Sila Kana i raitim

SKUL bilong Ai Bagarap long Medikel Skul bilong Yunivesiti bilong Papua Niugini nau i gat wanpela Risos Senta we yunivesiti bai trenim moa medikal opisa long kamap dokta bilong stretim ol bagarap i kamap long ai.

Dokta Jambi bilong Skul bilong Ai Bagarap i tok, "Kantri i mas i gat 72 Optamolojis long helpim olgeta populesen tasol nau ol i gat 14-pela optamolojis tasol insait long helt sistem bilong PNG.

"Wantaim dispela nupela risos senta, UNPNG Medikel Fekalti 'Skul bilong Stopim Ai Bagarap' bai trenim planti moa dokta long kisim save mekim wok bilong lukautim na stretim ai bagarap long kantri."

Nau yet long PNG i no olgeta

provins i gat ol ai dokta long ol haus sik. Dokta Jambi i tok i gat wan wan dokta i stap long ol provinsal na riferel haus sik long Lae, Madang, Wewak, Maun Hagen, Mendi, Rabaul.

Ol i lusim tupela taim ol i go insait long praivet bisnis na tripela i mekim wok edministresen long helt opis.

Nau yet i gat 5-pela kenidet i wok long kisim trening we bai stap 4-pela yia long kisim diploma na 3-pela yia long wokim pos greduet stadi.

Kristen Blain Misin (CBM) i sapotim yunivesiti wantaim wanpela leksera long yia bihain na i go taim Risos senta bai pinis.

Lions Australia i helpim wantaim AUD\$300,000 em olsem K700,00 long stretim wanpela haus long UPNG Taurama Kempas long

kamapim Risos Senta bilong Skul bilong Ai Bagarap.

Drew Keys, Jeneral Menesa bilong Brien Holden Vision Institiut long Australia i tok olgeta mani mak ol i yusim long dispela tripela projek em i stap olsem K2 milien we ol bai mekim wok insait long 12-pela mun.

Nau yet PNG Eye Care na Biren Holden Vision Institiut wantaim yunivesiti skul bilong ai bagarap i wok long trenim 16 medikel wokman na meri long ol bai wokim dispela stadi bilong sik bilong ai, Trachoma insait long tupela mun we ol bai makim wan wan haus long hap we stadi bai stap long en.

"Dispela bagarap i no kamap bikpela yet long PNG tasol mipela laik mekim dispela stadi long save sapos i gat binatang i stap na bai mipela ken redi long pasim rot bilong em hariap," Mista Keys i tok.

Kala pink long Oktoba makim kensa awenes

PINKTOBER em i nem bilong kempein bilong kamapim moa save na tingting bilong kensa we i save bagarapim na kilim dai ol meri long Papua Niugini, we bai kamap insait long mun Oktoba de 1 i go inap long 31, 2015.

PNG Institiut bilong Medikal Risets i makim olsem wanpela bilong ol 10-pela dai we i save kamap long sik kensa em i soim olsem tupela bilong dispela 10-pela em ol meri na ol i save dai wantaim sik sevikel kensa.

Kensa Faundesem bilong PNG, em ogenaiesesen i go pas long kamap



Piksa bilong ol samting ol i salim. Kala bilong olgeta dispela samting em i pink

awenes bilong dispela sik na long painim ol we bilong wokim ol risets long

daunim dispela sik, nau i wok long salim ol liklik samting olsem pink ribon,

ki ring na ol pen long mun Oktoba. Dispela em bilong kisim mani long helpim wok bilong risets na long kamapim moa awenes long komyuniti.

Ol bai yusim ol dispela mani long skulim ol pipel long we bilong lukautim ol yet na bai ol i no inap long kisim sik kensa, givim fri sekap long ol kain kain ples long kantri, na long wok patna wantaim ol lain ogenaiesesen long kamapim gut dispela wok bilong daunim sik kensa long kantri.

Sapos yu baim wanpela bilong ol dispela samting em bai yu inap long helpim Kensa Faundesem long ol i ken gat inap mani long ranim wok bilong ol.

Sastenebol Developmen i ken senisim na sevim laip

UNFPA, Yunaitet Nesenes Populesen Fan, i tok amamas long ol wol lida long ol i tok orait long 2030 Ajenda bilong Sastenebol Developmen, em i wanpela bikpela samting tru i kamap long histori bilong developmen long dispela kantri.

Wok bilong dispela yunivesal ajenda inap long litimapim planti milien pipel, sevim na senisim laip bilong bilion piple nae m inap

long lukautim graun bilong yumi.

Ol Wol lida i soim strongpela tingting long pinisim tru pasin bilong stap rabis na tarangu, long long lukautim rait bilong wan wan lain na long gutpela sindaun wantaim pasin bilong olgeta lain i mas kisim sevis bilong riprodaktiv helt, olsem famili plening.

Ol i tokaut long ol bai

strongim jenda ikwaliti na long strongim wok bilong ol bikpela meri na ol yangpela meri. Ol lida i tokaut gen long olgeta developmen i mas lukluk long ol manmeri moa long sastenebol developmen.

Ol i tok orait moa long visen bilong Program bilong Eksen ol i bin wanbel long en long 1994 Intenesional Konpresn long Populesen na Developmen long Cairo.

I gat 17 Sastenebol Developmen Gols we bai opim rot i go long taim we olgeta pipel bai kisim wankain sevis long helt wantaim seksual riprodaktiv helt, edukesen, long wankain mak.

UNFPA i gat strongpela tingting long sapotim olgeta wan wan meri, man na yangplea lain long bihainim dispela rot.

Ol i mas no ken lusim wanpela i stap nating.

Wokim saku, katim gras na penim long daunim kensa

HAUS SIK Poroman Faundesem, wanpela Wok Mari-mari ogenaiesesen long Pot Mosbi i tokaut pinis long Tunde dispela wik olsem tumora bai ol wokim wanpela bikpela kaikai long Gateway Hotel bilong bungim mani bilong helpim Kimbe Haus sik.

Long wankain taim tu Haus Sik Poroman bai tokaut long bikpela wok bilong fanresing we bai ol i wokim long de 11 na 12 Desemba, 2015.

Meri faunda bilong dispela ogenaiesesen, Janet Sios i tok, "Bikpela tingting bilong Haus Sik Poroman Faundesem em long helpim ol pikinini husat i kisim sik kensa na i stap long haus sik. Mipela i laik wok wantaim ol biknem pilaia bilong Pukpuk ragbi tim na ol



Ol tim bilong Haus Sik Poroman Faundesem: (Sanap em Charlie Gorogo, (sindaun) L-R Lorraine Genia, Janet Sios (Faunda) Kasti Turner Arifeae.

narapela, na tu ol singa long kam na sapotim dispela kempein."

Ol i bin kisim ol sponsa


pinis long ol tebol bilong kaikai. Mani we bai kamap long dispela kaikai em bilong helpim Kimbe haus sik

long baim sampela bet na sampela narapela samting.

Long wankain taim faundesem bai opim na tokaut long bikpela fanresing wok bilong katim ol hap gras i go kela o katim sot na putim kala we sampela narapela lain bai sponsa long em. Ol mani bai kamap long ol sponsa bilong helpim ol pikinini husat i gat sik kensa na i stap nau long Pot Mosbi Jeneral Haus sik.

Misis Sios i tok ol bai baim sampela bet bilong ol pikinini na tu long putim sampela samting bilong pilai long pilai graun bilong ol insait long hap bilong Pot Mosbi Jeneral Haus sik.

Moa stori bai kamap long dispela niuspepa long wik bihain.



Ol sponsa bilong ol ai projek - Lephon i go Raithan em: Thomas Kahai, Pot Mosbi Lions Klap, Doug Winterflood, PAST Distrik Gavana Lions Klap Queensland na Embeseda Walter North bilong USA Embesi long Pot Mosbi. Foto: Nicky Bernard

Painim yet tripela Katolik Bruder bilong Australia

Dai long Bogenvil long WW2...

Veronica Hatutasi i raitim

OL FAMILI bilong tripela Katolik Maris Bruder long Australia i painim yet wanem hap o ples tru bodi

olsem tripela i wok long givim infomesen long Japan ami i go long ol soldia bilong Amerika na ol pren kantri na ol i bin kilim dai ol.

"Sampela tok paul i kamap

ya i bin stap long ailan inap long wanpela de, wanpela opisa bilong Japan ami i tokim em,"ol Brudert bai go bek long ples bilong ol long Australia,"

"Long save bilong em, dispela i bin minim olsem ol soldia bilong Japan bai kilim ol nau bikos ol i mas luksave olsem tripela i no gat infomesen long givim ol.

"Sampela taim bihain long dispela, ol i bin katim het bilog ol log Sohano Ailan. Ol i no planim ol bikos bihain ol bai painim ol yet, tasol ol i kukim ol long nambis.

"Ol dispela infomesen we Laurie i bin givim i givim taim long dai bilong tripela long mun Oktoba o Novemba, 1942," Adam i tok.

"Long Mittagong, NU Saut Wels long Australia, wanpela monumen o hetston i stap long tingim tripela Bruder ya.

"I bin gat wanpela memoriel hetston long Maris Bruder Hai skul long Rigu, Kieta long Bogenvil, tasol em i bin lus long Bogenvil pait.

"Em i sori samting stret olsem ol wanlain famili na hauslain bilong tripela i gat wankain krismas i dai pinis wantaim no gat kliapela save long stap, dai na hap we ol i bin planim ol, Adam i tok.

Histori long tripela Bruder i go wok long Bogenvil Imoa long 75 krismas i go pinis i go olsem.

"Long yia 1941 Bruder Augustine i bin Prinsipel long Maris Bradasskul long Mossman, New South Wales taim Bisop Thomas Wade SM bilong Amerika husat i bin bisop bilong Noten Solomon i askim ol Maris Bruder kongriksen long Australia i salim ol Bruder i go wok long ol skul long Bogenvil.

Em i klia olsem bai gat pait, tasol Bruder Augustine na tupela narapela Maris tisa Bruder em Bruder Donatus na Bruder Ervan, i tok yesa long go.

Olsem na tripela i redi long go long Chabai long Bogenvil na statim skul long hap.

Long Ogas 1941, ol Bruder ya i go kamap long Bogenvil na ol i beis long Chabai, em Katekis trening skul we ol sumatin i save slip na skul.

Ol Bruder i skulim ol sumatin long Mets o namba, Inglis, Rilijen na ol prektikel skil subjek olsem kapenta na egrikalsa. i bin gat 100 sumatin long dispela taim.

Ol sumatin i bin groim long bikipela gaden ol pinat, swit potato, bin, kon, banana, popo na rais. Ol i save go painim pis. Ol Bruder i sindaun gut long wok na wanpela sumatin, Leo Lising, i bin tok ol i bin wok na stap amamas.

Distrik opis na kapitel bilong Bogenvil long dispela taim i bin stap long Sohano Ailan, Buka Pasis.

Taim pait i kamap, ol koloniel edministresen woklain i ronawe na ami bilong

Japan i tekova long Sohano Ailan, i no longpela taim ol Bruder ya i kamap na wok long hap.

Pastaim, ol Brudet na ol sumatin i ronawe na go hait long bus.

Tasol Bisop wade i go lukim ol na tokim ol long go bek long skul na wet long lukim wanem samting bai kamap.

Ol Japan i go long skul long Me 1942 na bungim ol Bruder, odaim ol long paitim belo na olgeta sumatin i kam.

Ol Japan soldia i bungim grup na tokim ol olsem bai gat bikipela pait long Bogenvil, na odaim ol sumatin long ronawe kwiktiam. Tasol ol i tok ol Bruder i mas stap long skul, tasol ripot i go long "kempetait o ol soldia bilong Japan long Sohano Ailan olgeta de.

Long Ogas 14, 7-pela de bihain long ami bilong Amerika i pundaun long Guadalcanal long Solomon Ailan, ol Japan soldia i surukim tripela Bruder ya i go long Sohano Ailan.

Long dispela taim, ol i saspek long ol Bruder olsem ol i wok lkong toktok wantaim ami bilong Amerika.

Ol asples lain i ripotim olsem ol i save lukim ol Bruder long ailan, tasol bihain long dispela, i no gat kliapela stori long wanem samting i bin kamap long tripela Bruder ya.

Long pinis bilong pait, Minista bilong Ekstenel Afeas bilong Australia i rait long ol Maris Bruder na tokim ol olsem long Ogas 19, 1942, ol Japan soldia i bin kisim Bruder Augustine, Donatus na Bruder John na putim ol i go long nevi sip bilong Japan. Na tok nevi sip i go long solwara na ol i no save waenm samting i bin kamap long en na ol pasindia i stap insait long en.

Olsem na long Ogas 20, 1942, ol i tok tripela Bruder ya i bin dai,"Adam i stori olsem

Em i tok ol Maris Bruder i givim dispela infomesen i go long ol famil bilong tripela Bruder na ol i bilip olsem tripela i bin stap long sip, MV Montevideo Maru.

Na wanpela samarin bilong Amerika i bin bomim Montevideo Maru na em i bin go daun long solwara taim em i wok long kisim ol kalabus lain long Rabaul i go long Japan.

Em i hat long kisim ol evidens o trupela stori long wanem samting tru i bin kamap long tripela, tasol long ol yia bihain, ol stori i kamap long ol lain long Buka na Bogenvil olsem tripela Bruder i bin mas stap antap long sip bilong ol Japan ami, Montevideo Maru.

Sapos husat long Bogenvil i gat sampela nius long dispela tripela Bruder ya, ringim na toktok long Veronica long telepon namba 72739408 o Adam Elliott long 73282377.



Bruder Augustine, Bruder Donatus na Bruder John i bin dai long Bogenvil long 1942 long Wol Wo 2, bihain ol soldia bilong Japan.

bilong ol i stap long en.

Dispela em 73 krismas bihain long Bruder Augustine, Bruder Donatus na Bruder John i bin dai long Bogenvil long 1942 long Wol Wo 2, bihain ol soldia bilong Japan i kisim ol olsem ol kalabus na kilim dai ol.

I kam inap nau, ol famili bilong ol i wok long painim ol, na nau olgeta wan krismas famili na hauslain bilong ol i dai pinis wantaim no gat save long trupela stori long rot we tripela famili memba bilong ol i bin go long en.

Tasol long Ogas 20 dispela yia, em i 73 yia opisel anvesari bilong tripela Maris Bruder ya i bin dai long han bilong ol soldia bilong Japan long Wol Wo 2, na ol famili bilong ol long Australia i bili olsem ol i bin dai long Sohano Ailan, Buka Pasis long Atonomas Rijen bilong Bogenvil.

Tasol wanpela kandere bilong ol, Adam Elliott, i kam wok long PNG na em i stori wantaim Wantok Niuspepa, long wari nastori bilong ankel bilong em, Bruder Augustine, na sapos sampela lain long Bogenvil na PNG i gat save long stori bilong tripela we ol i ken givim long en.

Bruder Augustine i bilong Sentrel Victoria, wanpela liklik stet long Saut Australia. Famili bilong en em ol fama. Mama i bin karim em long yia 1909 na givim em nem, Frederick Gerard Mannes. Em i bin kamap wanpela Katolik Maris Bruder long yia 1928 taim em i gat 19 krismas.

Em i bin tren olsem wanpela tisa na kism nem, Bruder Augustine taim em i joinim Maris kongriksen.

"Wanem samting i kamap, tripela Bruder ya, ripot we famili i kisim i soim olsem ol i bin kilim dai ol long Ogas 20, 1942.

"Ol Japan soldia i bin ting

olsem sip we ol i putim tripela Bruder long ol i bin kamap wanpela woa sip na ol i transferim tripela Bruder i go long Rabaul long Is Nu Briten, na nem bilong wo sip em Montevideo Maru. Tasol trupela stori i lus long woa," Adam i tok.

Adam i stori long infomesen ol i bin kisim long wanpela bisnis man Saina, Laurie Chan, husat i bin gat tred stua long Porton klostu long Chabai, Buka na em i bin wanpela poroman bilong tripela Bruder, na tu, em i bin wanpela sumatin long Chabai.

Adam i tok ol soldia bilong Australia i bin laik kisim Laurie Chan long sip na ronawe, tasol meri bilong em klostu i karim bebi na ol i bin stap bek. Ol soldia bilong Japan i bin kisim na kalabusim ol na Laurie i bin wok long ol olsem wanpela man bilog tanim tok.

Laurie i bin stori olsem ol soldia bilong Japan i bin saspek long tripela Bruder olsem ol koswasa (Coastwathers) na ol i arestim ol na kisim ol i go long Sohano Ailan long Buka.

Em i bin tok ol soldia bilong Japan i bin holim tripela Bruder long sampela mun long kisim infomesen long ol.

Adam i tok sampela toktok i kam aut long Bogenvil i sapotim ol toktok bilong Laurie.

"Wanpela soldia bilog Australia i bin beis long Buka na i go bek i bin wanpela sumatin bilong Bruder John taim em i wok tisa long Australia.

"Dispela soldia i bin harim ol asples lain i stap klostu long Tarlena Misin i stori olsem taim ol i go painim pis, ol i save lukim ol Bruder ya i wokabout long nambis na ol i save tromoi han long wanpela narapela.

"Laurie i bin tok ol Bruder

Baibel i no bilong Palamen

Long dispela wik Mande Post Courier Niuspepa long pes 7 het tok "BOC Support Speaker," em i tru long wanem BOC i go pas wantaim spika long mekim dispela wok bembe o kal long haus palamen. BOC i mas luksave olsem palamen i no haus lotu na i rong tru long putim KJV Baibel long haus Palamen na mislidim ol pipel bilong PNG. Na tu i rong tru long go long midia olgeta wik long wok bilong spika, BOC na KJV long Palamen haus. Inap long sios na politik long Palamen haus. I gutpela, lusim spika long sit bilong em long kontrolim haus palamen wantaim politik na skulim ol memba long hau ol i ken developim wan wan distrik long kamapim gutpela sindaun bilong yumi.

Long ol lain BOC sapos KJV Baibel i nupela long yumi, orait kisim i kam bek long pulpit na autim Gut Nius i go long ol manmeri. Plis spika, ol i no komisinim yu long autim tok bilong God, nogat! Ol manmeri bilong Finschafen i ilektim yu long mekim wok politik. Wan kain olsem i go long ol lida man bilong BOC, God i makim yumi long kamap Seped na lukautim sisip bilong em. Kaikai bilong ol em Tok bilong God na nau yupela i pilai soka i go i kam long haus Palamen.

Lusim Baibel na pasta i kam long haus lotu. Olsem wanem, Baibel em i wanpela nupela samting long PNG? Sori tru, Angliken Sios i bin i stap long PNG moa long 124 krismas na i no nupela long yumi. Wankain olsem long ol Katolik na ol arapela sios tu. Taim buk Tambu i kamap pinis long PNG, em i kamap faundesin long Bilip bilong yumi. Olsem na yumi i no ken paul.

Long dispela wik het tok, plis BOC noken yusim nem bilong lotu Angliken long wanem lotu Angliken i no save bihainim lek mak bilong ol palamentarian i go long haus Palamen long painim mani. Na tu, Angliken sios i no sapotim BOC na spika long dispela wok long Palamen.



KOMENTRI

Banisim gut graun bilong yumi bilong bihain taim

GRAUN em i laip bilong ol pipel bilong yumi. Hia long PNG bikpela hap graun moa, o kastomeri graun, i stap yet long han bilong ol papagraun.

Liklik hap tasol i stap aninit long gavman na ol bisnis. Long planti hap bilong kantri, pait i save kamap na pipel i dai long taim hevi bilong graun i kamap.

Sapos yu gat graun bai laip bilong yu i orait, bikos yu ken mekim kain kain samting long helpim sindaun bilong yu na famili bilong yu. Tasol dispela gutpela eksampel bilong graun i lukautim sindaun bilong yumi, i no tru tude.

Fifti yia i go pinis long taim bilong ol tumbuna dispela stori i stat long senis.

Long planti ples arere long taun, ol papagraun i larim ol ausait lain i kam sindaun na wokim bisnis long kastomeri graun. Sampela i salim graun tru.

Na sampela i rentim graun long sotpela taim tasol planti bilong dispela kain agrimen i kamapim ol setelmen, na tude i no isi long rausim ol.

Tude yumi lukim ol yangpela papagraun i guria long mani na i no wari long bihain taim bilong ol pikinini na tumbuna bilong ol.

Ol i salim nabaut graun long husat man o bisnis i karim mani i kam grisim em. Dispela kain pasin i kamapim planti hevi moa long ol bikpela siti olsem Mosbi na Lae.

Planti bilong ol 99 yia lis bilong kolonial gavman tu i pinis nau na ol tumbuna bilong ol papagraun i wok long hait na mekim ol kain kain dil wantaim ol bisnis lain.

I gat planti komplek i kamap pinis. Yumi wok long harim tu ol tok lukaut bilong ol gavman opisa long ol pipel i no ken salim graun bilong ol.

Tasol i gat sampela opisa bilong Dipatmen bilong Lens i wok long hait na helpim sampela lain long stilim graun.

Ol taitel na rekot bilong graun i paul nabaut na dispela i opim dua bilong ol stilman. Pasin korapsen i bikpela tru long nesene level na i go daun long ol provins tu.

Gavman i nidim graun long skruim moa developmen long ol taun na siti tude.

Em i singautim ol papagraun long rejista kastomeri graun bilong ol na wokbung wantaim gavman o ol bisnis long kamapim developmen.

Ol senis long lo bilong graun long PNG tude i putim sampela rot blok long ol pipel husat i laik salim kastomeri graun. Ol i mas bihainim stretpela rot bilong salim graun na kisim taitel.

Wanpela narapela askim i stap tu long ol ovasis bisnis lain husat i kam insait na baim graun.

Lo bilong PNG i tok wanem long ol kain lain olsem husat i no sitisen bilong kantri?

I mas gat moa pablik tok save



na ol pipel i ken klia. Long ol narapela kantri long wol, ol gavman i wari long ol bikpela kantri i wok

long go isi tasol na baim ol propeti long siti na ol bikpela fam ausait long siti.

Olsem na ol i strongim lo bilong kantri long banisim graun na propeti bilong ol long ol ausait lain. PNG tu bai inap long lukluk long dispela kain rot long banisim graun bilong yumi o nogat?

Ol bikpela developmen i wok long kamap ausait long Mosbi siti em wanpela gutpela eksampel. Planti bilong ol i kamap long lis graun ol ovasis lain i kisim long gavman. Siti i wok long gro hariap tru na bai nidim moa graun long sanapim ol kain sevis olsem haus sik na skul na polis stesin.

Tasol sapos gavman i no hariap long banisim graun ausait long siti, bai i no gat graun long bringim ol dispela kain sevis.

Boda bilong siti i surik i go ausait na bungim mak bilong Sentral provins tu olsem na i gutpela long wok bung wantaim ol long ol bikpela plen bilong developmen bilong siti long 20 o 30 yia bihain. Mekim olsem na redim graun bilong ol bikpela developmen bilong bihain taim.

Kontrak Bokis bai go daun long Sinod

Sape Metta i raitim

EVANJELIKEL Luteran Sios bilong PNG (ELC PNG) sios lidaman bilong Bena Bena distrik long Isten Hailans wantaim ol lain bilong sios i wok long redi nau long karim Kontrak bokis i go daun long bikpela Luteran Sios long Satelberg long Fin-schhafen distrik, ples we bai bikpela nesene sinod bai kamap long 2016.

Satelberg em i ples we namba wan misineri bilong Luteran sios i bin kamap

na statim namba wan Luteran sios bilong PNG.

“Mipela i wok long plen na redi nau long karim kontrak bokis na wokabaut stat long Asaroka i go daun long Goroka, bihainim Bena rot i go long Rinotebe, i go daun long Riona, Dumpu, Kaiapit long Markham Veli na bihain bai mipela i go na pinisim wokabaut long Satelberg na givim kavanen bokis i go long ol sios lida long taim bilong sinod,” Zamzia Sinikupa i tok. Em i tok em yet bai lidim

moa long 300 pipel long wokabaut i go na pinis o stop long Satelberg. Dispela wokabaut bai karamapim 400 kilomita stat long Asaroka long Isten Hailans na pinis long Setelbeg.

Sinikupa i tok as tingting bilong dispela wokabaut em long bringim kavanen i go daun na long wankain taim tu luksave long ol famili bilong ol namba wan misineri husat i bin bringim Luteran sios i kam long PNG. “Dispela wokabaut em i

gat bikpela mining bilong em, long wanem, mipela mas karim kontrak bokis na mipela bai singaut long ol sapota bilong sios long givim han na sapotim mipela we mipela i ken bringim i go na givim long ol famili bilong ol namba wan misineri bilong mipela,” Sinikupa i tok.

Em i tok, “Luksave long dispela ol famili bilong ol misineri em i bikpela samting, long wanem, dispela ol misineri tasol i bin bringim Gut Nius tok bilong God i kam long mipela.”



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea Telephone: (675) 325 2500 Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela yia, 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga

Editor Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

POTO NIUS



DASTI ROT: Baksait rot go olsem long Gerehu stej 6 na 7 i wok long go het yet. Dispela bai lukim 4 lein rot bai raunim olgeta hap long Gerehu sabeb. Wantok Niuspepa i no klia hamas mani i go long-wokim dispela rot long Gerehu tasol ol manmeri na pikinini long dispela sait we ol wokman i wok long en i komplen pinis long das ol i bagarapim ol olgeta de na nait.
Poto Nicky Bernard.

KAR BAM: Tupela kar i bam long wiken long raun about long PNGIPA na Ensisi insait long Pot Mosbi. Dispela i kamapim longpela lain long trafik long Waigani kam olgeta long Sir John Guise Stedim.
Poto Nicky Bernard



BRUKIM HET: Ol gret 10 sumatin bilong Badihagwa Sekenderi Skul i putim mak long eksem pepa bilong ol bilong gret 10 eksem long dispela wik. Badihagwa i gat 9-pela gret 10 klas i sindaun long dispela eksem.
Poto Nicky Bernard

Raun long Fiji long piksa

... Turis na malolo ples

PNG TURIS: Ol PNG nius ripota turis i raun na kism poto long wanpela hap bilong Lautoka siti.



HOTEL SEN GRUP: Hap bilong bikpea hotel grup, Sofitel i wanpela long ol we Pasifik Tuna konprens i bin kamap long en, na we planti ol lain i bin stap long bung i slip long en.



AMAMAS NA MALOLO GUT: Sampela turis i rileks stap long pulsait na hauswin bilong Westin Hotel na wanpela wokmeri i laik sevim ol.



SEVIS WANTAIM SMAIL: Bula gel, Mae, em wanpela long ol wokmeri long Sofitel Hotel risepsen i gritim ol turis na ol narapela klain bilong hotel wantaim naispela bula smail.



NU SILAN TURIS: Yangpela turis mama Nu Silan, Evonne Miller i amamas wokabaut raun ausait long Sofitel Hotel long Nadi wantaim liklik pikinini bilong em i gat tupela krismas, Jaime Miller.



NAISPELA NAMBIS: Tupela PNG turis, TVWan ripota, Ruth Rungula na Nesenel Fiseris Atoriti PR opisa, Priscilla Maigu i stailim i stap long Sigatoka nambis.



GUTPELA ROT: Sigatoka Hap haiwe rot ol i silim gut o putim kolta long Nadi i go olgeta long Suva we i save kism tri na hap awa draiv long kar. Ol Poto: Veronica Hatutasi

Veronica Hatutasi i raitim

FIJI em i wanpela naispela ples long raun, maski em i wok bisnis, skul, raun i go lukim ol poroman o long malolo tasol.

Fiji em i wanpela turis kantri we ol ovasis turis i save go stap na malolo gut long en.

Kantri Fiji i gat samting olsem 700,000 pipel na ol i tupela kain, tasol ol i stap gut wantaim wanpela narapela. Em ol asples Melanisen pipel na ol Fiji India we Ingran, kantri i bin lukautim Fiji pastaim i bin kism ol long wok long ol suga plantasin long Fiji.

Nau ol dispela Fiji India lain i gat 4- na 5-pela jenereesen o ol tumbuna, tasol tupela kain pipel i stap gut wantaim. Tru, olsem ol samting long wol, i save gat hevi

sampela taim, tasol i gat rot long stretim na tupela kain pipel i stap, wok na mekim ol samting wantaim.

Taim yu lukluk long ol yangpela pikinini, wanpela samting bai yu amamas long lukim em, bihain long skul long ol apinun, bai yu lukim ol pikinini, Fiji India na ol asples Fiji, i stori na wokabaut amamas wantaim.

Moa long ol narapela, susa siti olsem Suva na Lautoka, Nadi siti i pulap long ol bikpela hotel, holidie apatmen na ol risot.

Long rot tu, moa yet, long dispela hap rot long Nadi i go long Suva, ol risot i no isi we ol ovasis turis i save go long kism gutpela malolo, amamas long stap namel long netsa na driman long liklik hap paradais long Pasifik olsem

kain lukluk we planti ol ovasis kantri i save lukim na tingim ol liklik Pasifik ailan kantri olsem.

Fiji i no gat planti naturel risos olsem PNG, tasol turis em i bikpela bisnis i save pulim mani i go long kantri. Namba tu em suga.

Bikos Fiji em i turis kantri, pasin pren, hariap long smail na helpim ol man em ol ya. Long stua na maket, taim yu laik baim samting, yu ken "bargain" o kism long spesel prais taim yu kism tupela o moa samting.

Olgeta ples long taun, siti o long ol viles i klipela stret na yu no inap lukim wanpela pipia nabaut.

Larim Wantok ripota i kism yu i go raun long Fiji na yu lukim ol poto i gat ol ples samting long Fiji, we yu yet i ken glasim na skelim.



NAISPELA PRUT: Mangi Fiji India i wokim gut stret ol prut olsem painap na melon na putim insait long bikpela na longpela glas kontena we ol lang na das i no inap bagarapim, i salim i stap. Wanpela hap painap na melon em \$ Fiji Dola.

Talen so kamap long Nu Ailan

Ahimsa Kibikibi i raitim

Sampela gutpela talen tru long singsing na danis bai kamap insait long Lights Off Talen So long Nu Ailan Provins.

Dispela so i lukim ol kain danis olsem brek dens, singsing tumbuna, ol pop kopi singsing na tu ol singsing ol ben i raitim na bai pilai long namba wan taim tru.

Laits Off Talen So em komyuniti projek bilong Rotary Klap bilong Kavieng na dispela yia em i namba tu yia long resis we i lukim tu ol lain insait long Namatanai bai stap insait long en.

Ol wina bilong singsing, danis na ol grup tu insait long gren fainel bai resis long

moa long K6000 prais mani. Dispela wiken bai lukim ol hits raun, wangepa long Namatanai na wangepa insait long Kavieng long 17 Oktoba.

Presiden bilong Kavieng Rotary Klap, Henny Taurakava i tok dispela Talen so bai givim ol yangpela sans long wokim samting, mekim ol i wok bung, na tu, long praktis wantaim.

Em i tok stended i antap moa long dispela yia na sampela long ol yangpela husat i kam singsing inap long resis wantaim ol lain insait long Vocal Fusion Show bilong EMTV, long wanem stended bilong ol i antap tru.

Mista Taurakava i tok pipel i amamas tru, olsem na wan-

pela long ol lain i stap insait long so i ran 7 aua long bot, i kam long longwe hap tru long Mussau long traime sans bilong em.

Hits raun bai kamap long Sarere 10 Oktoba long Namatanai na long Oktoba 17 long Kavieng, pastaim long bikipela gren fainel long Oktoba 31 long Santu Pita Torot Hall long Kavieng.

Lights Off Talen So em Rotary Klap Kavieng i kamapim wantaim bikipela sapot bilong ol sponsa olsem Ling Stuckey Foundation, Steamships Joint Venture Stevedoring, Anita Constructions, Teachers Savings and Loans na tu Keynote Music Haus long Kokopo.

ABC trening helpim Bogenvil komyunikesen

WANPELA komyunikesen profesenal bilong Atonomas Rijen bilong Bogenvil, Korok Talakam i bin kisim wangepa trening wantaim Australia Brodkasting Kopresen (ABC) long mun Septemba long brigim ol tok save long ol pipel long wanem kain wok i kamap long Bogenvil Pis Agrimen.

Mista Talakam i save wok wantaim Bogenvil Buro bilong Pablik Afes,

Midia na Komyunikesen olsem wangepa senia produsa wantaim Redio Ples Lain, em i projek bilong ABG nius wantaim ol mobail redio long ol ples i stap longwe long taun.

Mista Talakam i bin wangepa bilong ol niusman husat i kisim wangepa awot long dispela yia wantaim Douglas Gabb Australia Pasifik Jenelises Intensip.

Douglas Gabb Intensip em Australia Gavman i givim long go wantaim tingting bilong ABC long helpim ol jenelis long kamapim gut save bilong wok na long bungim ol wantaim ol wanwok bilong ol long Australia. Leit Douglas Gabb em i wangepa memba bilong Redio Australia Tok Pisin tim inap long 20 yia.

Mista Talakam i bin go lukluk raun long ABC long Cairns, Canberra na Melbourne long mun Septemba we em i bin wokim ol trening

sesen wantaim wan wan lain long redio, televisen na sosel midia.

“Mi lainim planti gutpela samting long taim mi kisim skul long wan wan bilong ol save lain long ol dispela hap bilong midia komyunikesen olsem long ol editorial miting bilong ABC Pasifik Raun.

“Em i givim mi moa tingting na save long ol samting i save kamap long wan wan de insait long rijon na long bihainim yet olsem ol samting i kamap nau,” Mista Talakam i tok.

Em i tok olsem dispela intensip trening i givim em sans long kamapim netwok wantaim ol ABC jenelis bilong Saina, Indonesia na Vietnam husat i save ripot bilong

Redio Australia

“Mi lainim planti samting long rispekim ol narapela, lukautim ol save bilong wok na long gat klia tingting long ol bikipela toktok i wok long kamap long rijon na long wok bung wantaim long kamapim senis long taim yumi yusim ol risos yumi gat,” em i tok.

“Mi olsem wangepa senia produsa, mi bilip olsem ol save mi kisim bai helpim tru long wok bilong niusrum o prodaksen studio. Nau mi sanap strong long plenim ol brodkas taim long Bogenvil i ken save moa long fremwok bilong implementesen proses bilong Bogenvil Pis Agrimen na Refrendum.” Mista Talakam i tok.

Stori bilong tumbuna

Stori bilong Dok na Kapul

BIPO bipo tru long tumbuna taim i gat tupela marit i stap.

Nem bilong man em Erra na nem bilong meri em Kia.

Long dispela taim tupela i no gat pikinini. Tupela i lukautim dok na kapul na i save stap long wangepa bik bus ol i kolim maunten Wikauma long Simbu Provins.

Ol pipel i save stap gut tru i go, tasol wangepa taim, tupela marit i go long pati na raun na kam. Tupela i kisim gut kaikai na ol sampela abus na long dispela taim, dok em i go raun nabaut na kapul i stap long haus na ol i skelim kaikai na ol tripela i kaikai.

Ol i putim bilong dok i stap nau na tupela i kirap na tokim kapul long was long kaikai bilong dok na tupela i go waswas long wara Minal.

Nau i no longtaim kapul i pinisim kaikai bilong dok.

Dok i raun i go na hangre i kisim em na em

i tingim haus na em i kam. Tasol kapul i wokim rong pinis.


Tupela marit i waswas pinis na kam long haus, tupela i pilim olsem sampela samting i rong.

Dok i kros nogut tru long tupela. Tupela i kam kirap na helpim dok na ranim kapul i go long bik bus.

Kapul i go antap long kru bilong diwai na em rapim tang bilong em long han pinga bilong em na hatim bel bilong dok na tupela marit.

Dok i belhat na singaut na tok, mi baik kilim yu wangepa taim. Man i belhat na tok spia bunara bai sutim em wantaim diwai. Meri tu i belhat na tok, ol man bai kilim yu na bai yu kamap gutpela bilas bilong mi. Olsem na dok i kamap birua bilong kapul na dok em i gutpela pren bilong man na meri.

Cathy Yomil



Kolok long step bilong Haus Palamen long Canberra.



Kolok Talakam insait long ABC studio long Cairns, Australia.

TOKSAVE:
 WANTOK i askim ol gutpela rida bilong em long salim ol **tumbuna stori** i kam na bai mipela i putim long niuspepa. Sapos stori bilong yu i gutpela na mipela i putim long niuspepa, bai yu winim **K50** we mipela bai salim i go long akaun bilong yu, o salim mobail unit inap long **K50** i kam long fon bilong yu. Salim nem, edres na mobail namba bilong yu wantaim stori i kam long dispela edres: *Stori Tumbuna, Wantok Niuspepa, C/-Word Publishing Company, P O Box 1982, BOROKO, NCD, PNG* o email edres: editorial@wantok.com.pg Telepon namba: 3252500.
 Tenkyu



“Friends”
“Kaibigan”
 “Wantoks”

Air Niugini
www.airniugini.com.pg

1975

TODAY

Em nau! Ol pikinini i ken painim rot i go long ples wantaim Wantok kru...



Paps Kanage – tokaut na tok stret!

PAPS Kanage I go long wanpela konprens bilong ol bikman long ovasis long toktok bilong HIV & AIDS program.

Taim em i stap long konprens, em i bin raun long sait, long visit long ol hotel long danis long nait.

Konprens i pinis na Kanage i kam bek long PNG, na em I go long haus.

Em i givim ol deti klos blong em long mama long wasim.

Orait, mama i sekim ol poket bipo long putim ol klos i go long wasing masin.

Man, mama i kirap no gut tru long painim ol peket bilong kondom long ol trausis poket.

Orait em i putim ol peket i stap long rum long soim Kanage taim em i kam bek long wok long haus.

Long apinun, Kanage i pinis long wok na kam long haus.




Orait, ol pikinini i pilai stap ausait long haus, na mama i singautim Paps Kanage I go long rum na soim em ol peket bilong kondom.

Mama i tok ; em wanem samting ya?"

Taim Kanage i lukim ol peket, em i kirap no gut tru na em i tokim mama isi tasol; " eee, mada noken tokim ol mangi. Long bung ol i bin givim mipela olgeta. Na ai bilong ol planti man na mi sem long tok nogat.

Olsem na mi kisim tasol na pulumapim long poket. But, that is for your safety and my safety only". Em wei bilong Paps Kanage long saitim tok.

Phanda
Apo Kantri.



Ol wod lista hia:

- APIM
- ARASAIT
- BLEMIM
- BRUMIM
- DILIM
- DRAIWARA
- ETPELA
- FLET
- HANKAP
- HANSAPIM
- HOLIPASIM
- IMIGRESEN
- KALAPIM
- KAPSAIT
- KARUKA
- LOTIM
- LULUAI
- MESAIM
- MOSONG
- NAMEL
- OPERETA
- PATPELA
- PROSESIO
- ROPIM
- SETELMEN

I M Q E D F T C K I F H U E R P X H O A
 U A F E F D S W L M T I X D D I G E S S
 J E I S P F D L E I N L O C E L A A O T
 S O O A O K J E H G E I T I M T T E N R
 B H F R T A M Z A R S I E A E Y D A R T
 X I D O Q R F N N E A L N R P I L N O I
 I U L U L U A I S S E T E L M E N O E E
 D H Z D Z K S O A E W P A T P R I O H D
 Q C U M E A R R P N O T X T D N T V O L
 R T A T E P A S I U I U A I O P E S L M
 H I L R O S B U M J A P I M A K T L I D
 A S P S E A A N V G S S K K K E P M P T
 S B T E F I E I M O S O N G A W E E A H
 R S S H O T N R M S T A A E S L L R S M
 H V Y Q I L K E E G H Y M S B O A T I O
 D N N E R K C C I T F M E D F W G P M I
 F O O I N S R W O A I D L I I L O T I M
 T R P O E N I V T L U I Y A C R E E S M
 N S D T N L E S I L R B R U M I M T I H
 P L F H G N Q D S R E D N P S S C Y K R

Educated Kanage

Kanage i raun long Boroko na 3 kilok samting, em i kalap long PMV bas na i laik igo long Waigani.

Em i kalap stret na long dua bilong bas yet, em i lukluk i go long kilok bilong bas long fran winskrin klostu long ria visen mira. Em i laik save wanem taim stret long apinun em i lusim 4 Mail.

Kilok i tok 8:25 pm na hariap tru, Kanage i tanim na tok gutnait long boskru arere long em. "Gutnait Boskru,

Boskru i tok yu mas paull ya."


Kanage i tok " Mi educated o yu educated, yu wantaim draiva bilong yu i ran long nait ya, yutupela i no klia yet?"

Boskru i tok "Mi les long toktok long ol paul paul man, kisim bas pe i kam."

Kanage i tokim em "Yutupela paul paul i stap na kilok bilong yutupela long fran i tokim mipela olgeta olsem yutupela i ran long Mosbi siti long nait.

Side Kona Joe
M.B Hohola

Ansa bilong Wod Pilai isu 2143





TOK PISIN NEWS
from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)

Planti i stap hangere long Hela Provins



Taim bilong draut o bikpela san i kamapim bagarap long ol gaden kaikai long planti hap bilong Hailans. *Poto: ABC*

Caroline Tiriman i raitim

HEVI long sai bilong no gat kaikai bikos long draut o taim bilong bikpela san i bagarapim ol gaden kaikai, i wok long go bikpela moa long Hela Provins bilong Papua New Guinea.

Rocky Hepert, em i wanpela wodkawsela long Hela Provins i tok ol pipel long planti wod long Hela nau i gat wankain hevi.

Em i tok ol i bin meim wok panimaut na salim ol ripot

pinis i go long ol atoriti, tasol ol i wet yet.

Mista Hepert i tok ol i harim long redio na lukim long TV olsem helpim i wok long go long sampela hap long hailans rijon we i bungim wankain hevi, tasol ol pipel long planti hap long Hela i no kisim helpim yet.

Em i tok ol pipel long Hela i kisim taim no gut tru long ol kainkain hevi long draut, na em i mekim bikpela askim i go long gavman long givim helpim hariap.

Pasifik klaimet warias awenes long Yurop



Dispela em ol Litiana Kalsrap grup bilong Vanuatu na memba bilong Klaimet Warias bilong Pasifik. *Poto: ABC*

Caroline Tiriman i raitim

DISPELAawenes i kamap pastaim long bikpela Klaimet Senis miting long Frans long pinis bilong dispela yia, 2015.

Ol Klaimet Waria bilong Pasifik rijon klostu nau bai pinisim wanpela kempein o toksave i go long ol pipel bilong Yurop long bikpela wari bilong klaimet insait long rijon.

Ol i bin joinim wanpela narapela lain ol i kolim "People's Pilgrimage" na wokabaut tupela ten kilomita namel long Foligno i go long Assisi, klostu long Rome bilong mekim dis-

plea awenes i go long ol pipel long dispela hap.

Ol kempein em i bilong tok klia long ol pipel bilong Yurop long dispela bikpela hevi pastaim long bikpela miting bilong klaimet senis we bai kamap long Paris, biktaun bilong Frans long mun Desemba.

Litiana Kalsrap bilong Vanuatu i memba bliong dispela Klaimet Waria bilong Pasifik em ol i raun nau long Yurop na em i tokim Redio Australia olsem planti pipel long Yurop i no save long Pasifik i s tap we tru long wol.

Grup i kam bek long Pasifik.

Embaseda Collin Beck i toktok long UN ol Sastenebol Dvelopmen Gol



Collin Beck em Embaseda bilong Solomon Ailan long Yunaitet Stet na Permanen Reprisentativ long Yunaitet Nesens. *Poto: ABC*

Sam Seke i raitim

EMBASEDA blong Solomon Ailan long Yunaitet Stets na Permanen Ripresentativ long Yunaitet Nesens i tok dispela nupela Sastenebol Dvelopmen Gols bilong UN bai gutpela moa long ol kantri long Pasifik.

UN Jenerel Asembli i bin wanbel pinis long senisim dispela Milenium Dvelopmen Gols we i gat 8 pela gol wantaim dispela nupela Sastenebol Development Goals

we i gat 17 pela gol.

His Ekselensi Collin Beck i tok bikpela samting long nupela Sastenebol Dvelopmen Gols nau em olsem, em i gat planti helpim long ol wanwan kantri i ken karim aut.

Mista Beck i tok dispela bai moa gutpela long ol kantri long Pasifik we i no gat ol risos long karim aut ol dvelopmen gols we ol i makim.

UN Jenerel Asembli i makim long wol i karimaut dispela Sastenebol Dvelopmen Gols i go inap long 2030.

Pacer Plus tred inap strongim moa Pasifik



Solomon Ailan Ekting Tred Dairekta, Jack O'oi. *Poto: ABC*

Sisenel Woka skim

JACK O'oi em Ekting Dairekta bilong Tred, husat i lukautim tu sisenel woka na leba mobil long Solomon Ailan i tok Pacer Plus tred agrimen we ol i tok-tok longen long Melbourne, inap strongim moa dispela Sisenel Woka sistem we Australia na New Zealand i gat wantaim ol Pacific Ailan kantri.

Mista O'oi i stap tu long opisels miting we i go het long dispela wik long Melbourne bilong toktok long dispela Pacer Plus tred tingting.

Sampela lain i tok i gat wari long sait long tred long

rijon olsem Australia na New Zealand tasol bai kisim ol gutpela samting.

Sampela NGO olsem Pasifik Netwok on Globalaisesenon PANG i tok displea kain wokbung o Pacer Plus bai mekim ol Pasifikkantri i lusim planti samting.

Ol i tok wanpela long ol dispela samting em graun, we ol pipel i save lukim olsem blut bilong ol.

Tasol Mista O'oi i tok sait long sol sisenel woka i wanpela long ol samting we bai givim gutpela samting moa ol pipel bilong Pasifik wantaim tu New Zealand na Australia.

Australia i helpim mentel helt sevis long Solomon Ailan

Sam Seke i raitim

GAVMAN bilong Australia i wok long helpim Solomon Ailans long sait long bikpela hevi ol i gat long sait long mentel helt sevis.

Bosman bilong Nesenel Mentel Helt Sevis Dokta Paul Orotalao i tok helpim bilong Australia em i long sait long mani em i givim i go long Solomon Ailan gavman.

Dokta Orotalao i tok long sait biong mentel helt, helpim

i go long lukautim ol sik pipel long Nesenel Mentel HeltYunit we i stap long Kilu'ufi long Malaika Proviins.

Em i tok ol i save yusim tu dispela helpim bilong Australia long go lukim ol sik pipel long ol provins.

Dokta Orotalao i tok tu olsem bikpela hevi long sait long mentel helt long Solomon Ailan em i 'trauma' long sait long ol naturel disasta, na tu ol samting we pipel yet i wokim olsem vilans agensim ol.

Helen Hakena i laik lukim moa wok long PNG Mentel Helt

Caroline Tiriman i raitim

DAIREKTA bilong Leitana Nehan Dvelopmen Ejensi long Bogenvil, Helen Hakena, i tok Papua Niugini i mas putim ol Mentel Haus sik long 4-plea rijon bilong kantri olsem Sauten, Hailans, Momase na Ailans rijon.

Helen Hakena bilong Leitana Nehan dvelopmen ejensi long Bogenvilbin wokimm dispela toktok long Australia taim Australia i roaim ol program

long makim Mentel Helt wik long dispela wik.

Misis Hakena na lain bilong en i save helpim ol pipel i gat sik long het bihainim bikpela trabel long Bogenvil we planti tausen pipal i bin dai long en.

Misis Hakena i tok tu olsem dispela i save mekim ol famili bilong ol sikman long ol narapela provins i lusim planti mani tumas long salim ol dispela sikman i go long Port Mosbi, na long go visitim ol.

Ol tred opisa long Pasifik i toktok long Pacer Plus tred long Melbourne

Caroline Tiriman i raitim

SAMPELA toktok i kam aut strong olsem tingting bilong kamapim wanpela wokbung bilong tred namel long ol Pasifik ailan kantri, wantaim Australia na New Zealand bai helpim tasol dispela tupela kantri na ol PasifikAilan kantri bai lus.

Pacific Network on Globalisation o PANG i mekim dispela toktok long wankain taim ol gavman opisa bilong Australia, New Zealand na Ol Pasifik kantri i holim miting bilong ol nau long Melbourne.

Dispela lain i tok tu olsem ol i wari tru long wanem sapos dispela ol toktok i kamapim wanpela tok orait, dispela bai larim Australia na

New Zealand long pulumapim ol ailan kantri wantaim ol bisnis, wokman na bagarapim ol narapela wokbung bilong trade em ol ailand kantri i gat wantaim ol narapela kantri.

Narapela wari bilong ol em olsem sapos dispela Pacer Plus i go het trutru, em bai stopim ol asples pipel long holim na lukautim ol graun bilong ol.

Tasol dairekta bilong Ekstenel Tred long Ministri bilong Foren Afeas long Vanuatu, Sumbe Antas, husat i stap tu long dispela miting i tok ol i wok long toktok yet long dispela tred agrimen, na ol i no kern hariap na tok em bai no helpim ol Pasifik kantri.

Sapos yu no laikim Australia, go

SIAMAN bilong Parramatta Mosque, Neil El-Kadomi i mekim strongpela toktok. Poto: ABC



Strongpela het Muslim mangi i gat 15 krismas i bin sutim dai Curtis Cheng em akaunten bilong polis long las wik Fraide na nau ol wok painim i go het long dispela samting. Mista El-Kadomi i tokim kongriksen bilong em long luksave long Australia na ol velyu bilong em sapos ol i laik stap long dispela kantri.

SIAMAN bilong Sydney mosque o haus lotu bilong ol Muslim i tokim ol sios memba olsem sapos ol i no laikim Australia, ol i mas lusim na go.

Em i wokim dispela toktok long namnba wan semon o tok skul long sios bihain long wanpela yangpela Muslim man i save go lotu long hap i bin sutim dai narapela man ausait long Nu Saut Wels polis hetkota.

Toktok bilong em tu i kamap bihain long Oposisen i singaut long gavman long hariap mekim wanpela wok panimaut long ol strogpela het lain i save wokim trabel long ol stet skul.

Tunisia makim rausim dikteta na strongim demokrasi aniveseri ...Winim Nobel Pis prais



MIPELA YA! Ol lain long Tunisia i amamas long kisim luksave awot bilong Nobel Pis Prais long go pas long wok bilong painim bel isi na kantri i bin holim gutpela na fri ileksen.

OL i bin fomim Tunisia Nesenel Dailog Lig i gat long en ol sivil sosaiti grup long 2011 taim ol i laik rausim dikteta lida bilong kantri long strongim demokrasi.

Lig ya i bin sevim demokrasi long kantri Tunisia we i bungim ol salens long politikel, ikonimik na sekyuriti sait.

Norwegian Nobel Komiti i bilip olsem prais long dispela yia bai kontribut long lukautim demokrasi long Tunisia na givim hop long ol lain i promotim bel isi na gutpela sindaun, demokrasi long Midel Is, Not

Afrika na wol. Prais mani bilong Nobel Peace Prize em 8 million kraun long mani bilong Sweden na ol bai prisnim long Oslo long mun Desemba long dispela yia.

Ol memba bilong negisieting tim bilong Tunisia i tok dispela awod i kamap olsem mesej long rijon long pawa bilong dailog o toktok na awot em i luksave long ol matir bilong demokrasi long Tunisia.

"Tunisia i gat bikpela amamas long luksave em i kisim

tasol tu, em i hop bilong Arab wol," UGTT chief Hussien Abassi i tok.

Ouided Bouchamaoui, em presiden bilong Tunisia Konfederesen bilong Industri, Tred na Henkraf i tok dispela awot i ken stiaim ol long gutpela rot. Long rijon i putim daun ol gan na ol narapela samting bilong pait na sindaun paitim toktok long negosieting tebol.

Em i bilip olsem prais ya bai helpim ol long skruim wok na givim gutpela tingting long ol pipel bilong Tunisia.

Stap amamas i bikpela samting

PROFESA Paul Dolan i profesa bilong Ikonimiks long London Ikonimiks Skul i wanpela long ol man long wol i go pas long sait bilong tingting long pasin bilong stap amamas.

Em i mekim wok risets na statim wantaim em yet husat i gat hevi long sait bilong toktok long wanem, em bin save painim hat long toktok.

Amamas olsem Profesa Dolan i lukim em eksperiens bilong gutpela taim na as long gutpela samting i kamap.

Givim moa taim long stap wantaim ol pipel yu laikim, stap ausait moa, harim mu-sik, bungim sampela nupela eksperiens na helpim ol narapela, em Profesa Dolan i lukim pasin bilong amamas olsem.

Em i tok wokim sampela o olgeta long ol dispela na bai yu senis na kamap wanpela amamas man.

Profesa em i wanpela



Paul Dolan i mekim kliia

ikonimiks na profesa bilong bihevia saiens i givim edvais long gavman bilong UK na Amerika long velyu bilong stap amamas na em i tok strong olsem mental helt em bikpela samting long helt bilong man na long stap gut. Em i tok em i hat long senisim tingting bilong man, tasol "fokas long envairomen, situesen na rot we yu ekt o wokim samting long en."

Nupela muvi bilong Springfield na Streep



Rick Springfield long yangpela bilong em wantaim gutpela pren bilong em, gita.

Obama tok sori long ol famili long Oregon

Ol protesta o lain i egensim gan kontrol lo long Oregon i holim posta taim kar we Presiden Barack Obama i sindaun insait long en i go na abrusim dispela hap rot

US presiden, Barack Obama i bin raun i go long Oregon long tok sori long ol famili we i dai long taim wanpela man i go wail na sut long ol wantaim gan.

Suting i bin kamap long tupela kolis na yunivesiti long Amerika las wik.

Mista Obama i bin raun i go long Roseburg long bungim ol famili bilong 9-pela pipel we wanpela man wantaim gan i bin sutim ol long Umpqua Komyuniti Kolis, tasol bihain, ol polis i bin sutim em.



Mista Obama i bin tokim ol ripota olsem em i pilim strong olsem ol i mas kontrolim ol gan, na kantri i mas wok wantaim long stopim ol kain samting moa olsem i no kamap long bihain taim.

Wokabout bilong em i kamap long wankain de we wanpela sumatin man i gat 18 krismas i bin sutim dai wanpela wanklas bilong em na kamapim bagarap long narapela tripela sumatin.

Rick i ekt olsem Greg, wanpela musikman we Meryl Streep i gat laik long en na poromanim.

Planti biknem ekta i bin resis long kisim dispela ples tasol bikos Rick em i gitaman, em i win na kisim n ektim.

Rick i bin feveret ekta bilong ol yangpela, rok singa na gitaris i bin winim grami awot wantaim bikpela singsing bilong em long ol yia long 1980, Jessie's Girl.

Planti milien pipel i save lukim em long TV siris, General Hospital we em i ektim Dokta Noah.

Rick i bin stap planti yia long Australia, na liklik taim long Inglan. Papa bilong em i bin wanpela ami na olgeta tupela yia, em i save muv i go long nupela skul.

Dispela i bin mekim em i bungim hevi bikos em i mas lusim ol nupela poroman, tasol long wankain taim tu,

em i bin laik go long ol nupela ples.

Dipresen i bin kisim em we em i lukim em yet olsem em i no gutpela na em i no gat as long stap laip, em i no gat poroman na taim em i gat 17 krismas, em i bin laik hangamapim na kilim em yet, tasol bihain em i mekim samting em yet long daunim dispela hevi na em i kamap orait na skruim wok singa na ekta.

ANZ sapatim bung bilong meri



Bosman bilong ANZ PNG Mark Baker (lephan), bosmeri bilong Legal na Komplaiens Melissa Jojoga na Bosmeri bilong Humen Risos Ann Steel bai toktok long dispela bung long Kenbera, Sidni na Brisben.

ANZ Benk i sapatim wanpela bikpela bung bilong ol meri PNG i kamap long Australia. Nem bilong dispela bung em 'PNG Jenda Pariti Simposium'.

PNG Hai Komisnin long Australia na Asia Pasifik Profesenal Asosiesen i kamapim dispela bung long Kenbera, Sidni na Brisben long Australia long Oktoba 13 - 16.

ANZ CEO PNG, Mark Baker, i tok, "Mipela i amamas long sapatim dispela bung we ANZ i amamas long

kamap olsem Pletinum Sponsa. ANZ i luksave long long kain kain samting ol meri i save mekim long olgeta ples we benk bilong mipela i stap. Long PNG, mipela i save helpim ol meri long kamapim gutpela samting we i ken senisim laip bilong manmeri na kamapim gutpela samting."

"ANZ i amamas long helpim manmeri long olgeta ples we em i mipela i gat brens na i wok long sapatim ol meri," Mista Baker i tok.

"Dispela em i gutpela pasin long mekim long komyuniti na em i gutpela rot long wokbung wantaim governmen."

Dispela bung bai laukim ol sampela bikpela meri PNG na Australia husat i save wok olsem loya, tisa, ensinia or akaunten i toktok.

Ol dispela meri bai toktok long wanem kain ol samting ol meri i ken mekim long larim planti meri i wokbung long kirapim gutpela sindaun long wokples bilong ol na long komyuniti wantaim.

Nupela sistem bilong Digicel mekim isi long kisim data plen

OL Digicel kastoma husat i save kisim data bilong go long intanet nau i no gat planti hatwok bikos i gat wanpela namba tasol em *777# long bihainim.

Long Oktoba 6 las wik, Digicel i tokaut long dispela nupela sistem wantaim gutpela moa sevis menu we ol sabskraiba nau inap long kisim data moa yet wantaim ol sosel plen wantaim dispela wanpela namba tasol.

Ol kastoma nau bai ino ken paol bikos ol bai tingim wanpela namba tasol em long, *777#, long baim na menesim pripeid data na sosel plen wantaim sotpela menu tasol long Tok Pisin o long Tok Inglis.

"Taim mipela putim aut dispela *777# sistem, mipela i

amamas long bringim gutpela moa kastoma ekspiriens i go long planti milien sabskraiba bilong Digicel husat i baim ol data na sosel plen. Dispela sevis i mekim ol kastoma long stap long ol plen wantaim isi reit," Digicel PNG CEO, Maurice McCarthy i tok.

"Taim mipela i skruim taim bilong autoriniuwol i go long olgeta data plen na long givim data i no gat mak long rol ova, ol kastoma bai inap long amamas na yusim dispela sevis wantaim moa valiu i kam long Digicel data," em i tok.

Long stopim auto riniuwol, ol kastoma bai daelim gen *777# na makim 'Stop Auto Renew' long mein menu. Ol sabskraiba husat nau i no go insait yet long wanpela data

o sosel plen bai kisim nomol sas long baim 49 toea long wanpela Mega bait (MB) taim ol i yusim. Em bai moa dia long yusim dispela sevis. Insait long *777# sevis, wan hua data plen tasol bai no inap long auto-riniu.

Na tu sapos kastoma i les, ol i ken kamaut long dispela sosel na data plen taim ol i presim *777# menu. Moa long dispela olgeta data we ol i no yusim bai rolova na kastoma inap long yusim gen wantaim narapela data em i baim bihain. Kastoma inap long sekim balens bilong em wantaim data bilong nupela sotpela menu.

Taim sabskraiba i stap long wanpela plen, em bai holim yet data bilong em na sevim mani.

Taim bilong bikpela san kirapim rot transpot bisnis



Wanpela lenkrusa i katim Gawar riva long go long Basamuk long Madang-Saidor rot.

James G. Kila i raitim

MOA long 20 o 30 krimas i go pinis no gat ol PMV o kar i save ran namel long Madang-Saidor rot bikos ol bikpela wara i stap na i no gat bris.

Tasol stat long las tupela mun i go pinis transpot na PMV bisnis i kirap long Madang-Saidor rot bikos nau i taim bilong bikpela san na level bilong planti ol bikpela riva namel long Madang na Saidor i go daun olgeta na i isi long ol kar i ken abrusim.

Longpela drai sisen nau i givim gutpela sans tu long sampela lain long kirapim wok bilong transpot bisnis.

Long taim bilong ren ol pipel long ol rurel ples long Raikos i save yusim motobot tasol long

go kam long Madang taun. Planti lain i dai long solwara long taim nogut tasol gavman i no luksave na wokim bris long ol bikpela riva.

Ol dispela bikpela wara i save karim ol bikpela ston na long taim wara i tait em save givim taim tru long ol kar i abrusim. Olsem na planti yia i go pinis ol kar i no save yusim tumas dispela rot. Sampela long ol dispela bikpela wara em Yowor, Minjeng, Guabe, Gawar, Yaganon, Nankina na ol arapela moa i stap.

Nau yet planti ol trak na 4-wil draiv kar i ran namel long Madang na Saidor. Planti ol lain husat i gat ol stua i wok long baim kago na bringim long kar i go long ples bilong ol.

Ol PMV tu i putim fi i go daun na dispela em orait long planti lain.

Ol manmeri long ples i luksave long transpot i ran long rot na kirapim ol bet-maket are long rot na salim ol kaikai na buai, daka na kulau.

Dispela longpela taim bilong san tu i kamapim bisnis long em yet bikos ol kaikai na samting ol pipel i laikim em i sot tru. Mi bin wok stap long Basamuk na mi kisim taim stret long baim daka bikos daka long Raikos i sot stret. Long Tunde mi wantaim ol wanwok i baim rop-daka o ruts bilong daka stret na kaikai wantaim buai. Ol lain long maket i kolim dispela rop o ruts daka 'pawa-lain."



Glen McGuire, ANZ I go pas long POMCCI bisnis brekfas long las wik Trinde long Pot Mosbi Yacht Klap.

Papagraun redi long mekim bisnis

OL papagraun o lenona bilong Angore ges projek aninit PNG LNG Projek i redi nau long kisim K12 milien bisnis developmen gren (BDG) bilong ol.

Ol i no bin kisim dispela mani bikos planti papagraun grup i bin resis long kisim na gavman i bin paul wanem grup em i tru tru lenona grup bilong Angore husat inap long kisim dispela mani.

Bihain long altanativ disput risolusen (ADR) we Nesenel Kot jas Jastis Ambeng Kandakasi i bin karimaut long Madang long mun Septemba, ol tru tru papagraun i kamaut ples klia.

Siaman bilong Halapura klen long Angore, Hari John Akipe i tok ol papagraun long Angore i redi long go het na

mekim bisnis wantaim dispela K12 milien BDG bikos ol papagraun i bung wantaim na redi long mekim bisnis taim ADR i bin glasim na painimaut ol papagraun husat i stap long ol welhet eria.

"Jastis Kandakasi i glasim gut ol papagraun grup na painimaut pinis ol tru tru papagraun husat bai kisim benefit long Angore ges projek," Hari Akipe i tok.

Em i tok ol pipel bilong Angore i makim 5-pela lenona siaman husat bai makim maus bilong Halapura, Imika, Perege, Hulupari na Ura klen.

"5-pela welhet long Angore i stap antap long graun bilong ol dispela klen. Ol arapela 42 klen i stap arere long welhet tasol mipela wantaim bai ske-

lim dispela mani na mekim bisnis," Hari Akipe i tok.

Em i tok ol pipel bilong Angore i nidim gavman sevis olsem gutpela rot, skul, haus sik na pawa lait.

"Mipela i nogat dispela ol sevis long ples. Mipela bai yusim dispela BDG long kirapim bisnis na senisim laip bilong ol manmeri long ples," Hari Akipe i tok.

Em i mekim dispela toktok long Pot Mosbi long ai bilong narapela ol lenona lida olsem Hari Elija Timba, Tamule Kulu, Tambiawi Tangilape, Tinako Mondo na Thomas Haguai Arawi.

Ol dispela lenona lida i makim maus bilong dispela 5-pela klen we ADR i painimaut olsem graun bilong ol i stap long welhet aria.

Yangpela meri tok tenkyu long Air Niugini

Hannah Hola i givim droing bilong en olsem presen i go long Rei Logona, Jeneral Menesa Human Risos long Het Opis bilong Air Niugini long 7-Mail, NCD.



ANZ Vanuatu kastoma i wina bilong Pasifik Mega Kempein

ANZ i tokaut long dispela wik olsem wanpela kastoma bilong ANZ long Vanuatu i kamap olsem namba 3 wina bilong Pasifik Mega Kempein long winim AUD 25,000.

Gloria Lango bilong Vanuatu i winim dispela kwatali prais taim ol lain long ANZ benk i kisim nem bilong em namel long tausen pipel husat i putim nem long dispela resis.

Bikpela toktok bilong dispela mega kempein em, "Bekim gutpela pasin bilong wok wantaim ANZ", em i stat 12 mun pinis long wokim dispela Kempein long kara-mapim olgeta hap bilong Pasifik we ANZ i save bringim sevis olsem long Vanuatu, Fiji, Papua Niugini, Samoa, Tonga, Cook Ailans, Timor Leste, Kiribati na Solomon Ailans na givim sans long go insait long dro long winim AUD25,000 long olgeta tripela mun.

Total mani ol i givim i go pinis long ol wina em long mak bilong AUD75,000 long prais mani i go long ol kastoma bilong ANZ benk.

Misis Lango em i wanpela mama bilong lokal bisnis na long taim em i kisim dispela AUD25,000, em i tok: "Insait long laip bilong mi, dispela em i wanpela bikpela taim bilong mi amamas!"

"Mi save benk wantaim ANZ longpela taim tru na dispela em i presen bilong mi. Tenkyu ANZ! Mi hop dispela bai kirapim bel bilong ol narapela Ni-Vanuatu long i gat bilip na driman na kisim wanem kain helpim em ANZ i givim," Misis Lango i tok.

ANZ CEO Vanuatu, Charles Rickey i tok

amamas long Misis Lango na i tok tenkyu long em long stap longpela taim kastoma bilong ANZ long taim em i givim sek mani long em.

"ANZ i gat strongpela laik long wok long Vanuatu na ol kastoma bilong en, na wantaim dispela kempein mipela i tingting long soim amamas bilong mipela wantaim ol husat kastoma nau i stap, na tu long tok welkam long ol nupela kastoma bilong ANZ," Mista Rickey i tok.

"Mpela i bin wok insait long Vanuatu nau moa long 45 yia na mipela gat laik long stap yet long hia na mekim wok i go long helpim developmen bilong Vanuatu," em i tok.

ANZ CEO bilong Pasifik na CEO bilong Fiji, Vishnu Mohan yet i bin ringim Misis Lango long Fraide apinun taim em i bin stap yet long ANZ Port Vila brens na tok kongresulens long em.

"Kongresulesen Misis Lango! Mipela amamas long win bilong yu. Tenkyu long yu makim ANZ olsem benk bilong yu!" Mista Mohan i bin tok long telepon.

Tupela wina bilong Pasifik Mega Kempein pastaim em Mwateiti Areke bilong Kiribati na Krishneel Naidu bilong Fiji. Las Pasifik Mega Kempein wina bai ol i wokim dro na tokaut long mun Desemba. ANZ i bin stat wok long Vanuatu long yia 1971 na em i bikpela benk tru insait long kantri na em i gat tupela brens, 17 ATM na moa long wan handet wokman na meri i wok long Ritel na Kopret kastoma.

HANNAH Hola em i gat 23 Krismas bilong Kukipi viles long Malalaua, Galp Provins i mekim wanpela gutpela pasin tru bilong tok tenkyu taim em i givim wanpela tumbuna disain long Air Niugini long stat bilong dispela mun.

Hannah em i wankain olsem ol narapela yangpela lain husat i wok long painim gutpela sindaun bilong laip na em i yet i go insait long pasin bilong droing na penim ol kain kain stail piksa.

Long stat bilong dispela mun, Hannah i bin go long Air Niugini Het opis long 7-mail wantaim dispela presen bilong em na em i givim i go long Air Niugini menesmen long tok tenkyu long kampani i givim wok long papa bilong em inap 36 yia na lukautim famili bilong em.

Papa bilong Hannah, Oafeope Hola i bin wok olsem wanpela fomen bilong Air Niugini na em i bin stat wok wantaim kampani long Janueri 2, 1979 na em i stap yet inap em i ritaia long Ogas 7, 2015.

"Papa bilong mi i no save olsem mi mekim dispela pasin. Mi laik tok tenkyu tasol long Air Niugini long wanem samting em i mekim long papa bilong mi na long laip bilong mi olsem wanpela pikinini bilong man i wok wantiam ANG. Famili bilong mi i save raun insait long kantri na ovasis. Em bai no inap kamap sapos Air Niugini i no stap," Mis Hola i tok.

Hannah i tingim bek tu ol Krismas pati we ol famili bilong olgeta wokman i save go bung long wokples bilong papa bilong em na tingim ol nois bilong balus em i save harim long taim em i stap liklik.

"Air Niugini i mekim bikpela senis long laip bilong. Mi kam wantaim papa olsem wanpela liklik pikinini na mi kamap bikpela wantaim Air Niugini. Maski mi bai harim na lukim yet ol balus i kirap na pundaun, tasol nau em i narakain liklik bikos papa bilong mi i lusim pinis Air Niugini. Nau em mipela i no moa hap bilong Air Niugini woklain tasol taim mi flai long Air Niugini, em i bringim tingting bilong mi i go bek gen long ol gutpela taim mipela i save gat wantaim kampani," Mis Hola i tok.

Air Niugini Jeneral Menesa Human Risos, Rei Logona i kisim dispela droing pen long makim Air Niugini Menesmen

Em i tok tenkyu long yangpela Hannah na i tok, "Em i gutpela tru long lukim wanpela yangpela meri i mekim kain pasin we long tingting bilong em yet em i mekim olsem. Dispela i soim olsem Hannah, olsem pikinini bilong wanpela olupela wokman bilong Air Niugini i gat gutpela tingting tru long laip bilong papa bilong em wantaim Air Niugini. Dispela em i wanpela kain pasin stret na i gutpela tru," Mista Logona i tok.

Namba bilong ol Krismas we Mista Hola i wok wantaim Air Niugini tu i soim olsem em i wanpela gutpela bos na kampani bilong lukautim ol sitisen na ol wokman bilong en.

Frens bisnis man bai kam lukim PNG

WANPELA hai level tred na invesmen delegesen bilong Frans bai kam long PNG long Novemba 2-5.

Dispela delegesen o grup em ol bisnis manmeri bilong Frans na ol i laik inves o mekim bisnis long PNG.

Praim Minista Peter O'Neill i salim tok amamas na welkam pinis long ol dispela bisnis manmeri husat bai kam raun long Pot Mosbi na Lae.

Ol dispela bisnis manmeri bai nau kam long PNG bihain long wanpela wankain tred na invesmen delegesen bilong PNG i bin go long Paris, Frans long Jun dispela yia.

"I gat planti opotuniti o sans bilong manmeri na bisnis insait long Frans na Papua Niugini wantaim," Mista O'Neill i tok.

"Fraens em i wanpela strongpela maket bilong Papua Niugini we ol samting PNG i save salim i g aut i

save painim rot i go aut long ol arapela Yuropen Yunion (EU) maket.

"Taim yumi strongim poroman long bisnis, dispela bai kamapim mo wok na sans bilong kirapim mo bisnis taim ol manmeri tu kamap poroman.

"Long Jun dispela yia, mi bin bungim sampela ol bisnis lida bilong Frans Bisnis Konfederesen na mi bin tokim ol long kam lukim Papua Niugini na sekim wanem kain ol sans bilong mekim bisnis i stap long PNG."

"Dispela bisnis grup bai gat ol bisnis lida i kam long risos na enejji sekta, agrikalsa na ol arapela bisnis eria."

"Ol sampela bikpela Frens kampani i kam pinis na stap long PNG we ol bai gro.

"Total S.A. bilong Frens bai kamap wanpela bikpela investa we em bai kirapim namba tu LNG projek long Elk-Antelop."

Dispela bisnis grup bilong Frans i kam lukim PNG bihain long narapela bikpela bisnis grup bilong Yunaited Kindom (UK) i kam raun na go bek las wik tasol.

"Yurop em i long we tumas long PNG tasol bisnis na invesmen bai mekim ples i klostu.

"Ol bisnis manmeri bilong UK tu i kam raun long PNG las wik long wanpela as tasol na em i wankain olsem ol Frans bisnis manmeri i kam nau. Em long invest, mekim bisnis na kamapim gutpela poroman namel long kantri bilong yumi na ol," Mista O'Neill i tok.

"Ol i painim gutpela ples bilong mekim bisnis we gavman i stap strong na ikonomi i stap gut. Ol narapela kantri long wol i luksave pinis long PNG olsem wanpela gutpela kantri long mekim invest na mekim bisnis," Mista O'Neill i tok.

Petromin bai salim Tolukuma

PETROMIN PNG Holdings bai salim wanpela namba wan gaden bilong en – Tolukuma gol main.

Tolukuma gol main i stap long Goilala distrik insiat long Sentral Provins na Petromin i bin lukautim dispela gol main.

Wanpela kampani bilong Singapura, Asidokona Maining Risoses PTE Limited, i laik baim dispela namel sais gol main bihain long Petromin na Asidokona i sanim wanpela agrimen ol i kolim Sel Se Agrimen long las wik Trinde.

Asidokona bai putim K40 milien long kirapim na ranim Tolukuma gol main.

Petromin Menesing Dairekta, Thomas Abe, i tok Petromin i bin tingting long salim dispela gol main long longpela taim yet.

"Mi amamas long Asidokona i wanbel long baim Tolukuma. Asidokona i gat

mani na gutpela tingting long kirapim dispela maining na larim ol manmeri PNG yet i wok na ranim Tolukuma, "Mista Abe i tok.

Eksekutiv siaman bilong Asidokona, Philip Soh i tok em i laik larim ol manmeri PNG yet i wok long dispela maining.

"Mi amamas long Asidokona i baim Tolukuma. Ol manmeri PNG yet bai wok na kirapim dispela maining, "Mista Poh i tok.

Dispela agrimen namel long Asidokona na Petromin bai larim Sentral Provinsal Gavman na ol papagraun bilong Tolukuma i kisim 10 pesen seaholing long kampani Asidokona.

Aninit long dispela agrimen, Asidokona bai yusim K6 milien long mekim nupela rot projek insait long Goilala we ol pipel na papagraun bai

yusim dispela rot long kisim ol gaden kaikai i go long maket, go long haus sik na go long skul.

Asidokona i tok ol bai mekim dispela nupela rot long joinim Tolukuna na Hiritano Haiwe. Doa-Tolukuma rot bai kamap bikpela rot na i no long taim em bai joinim Tolukuma wantaim Hiritano Haiwe.

Maining Minista Byron Chan i tok tenkyu long Asidokona i mekim dispela disisen long kam mekim maining bisnis long PNG.

Mista Chan i tok dispela i soim olsem ol narapela investa o bisnis man long ol arapela kantri i bilip strong long gavman na i redi long mekim bisnis wantaim PNG.

"Em i gutpela samting. Ol i gat konfidens na ol i bilip long dispela kantri olsem wanpela gutpela kantri long mekim bisnis," Mista Chan i tok.

Rot Apgret bai kamap long Hela Provins



Ol memba bilong palamen wantaim Minista bilong Woks na Implementation i sanap kisim poto bihain long Seketeri bilong Dipatmen bilong Woks i sainim agrimen wantaim ol kontrakta long ai bilong Ekting Gavana Jeneral, Spika bilong Palamen bilong PNG, Theo Zurenuoc.

DIPATMEN bilong Woks i makim maus bilong Gavman bilong Papua Niugini na i tokaut pinis long rot apgret bai kamap long Nipa-Ambua na Halimbu-Nogoli insait long Hela Provins.

Dispela rot apgret em i kam olsem wanpela hap bilong Trens 2 bilong Esien Developmen Benk (ADB) long stretim obikpela rot long Hailans

rijon namba wan rot netwok.

Em i bhainim ol bikpela polisi bilong gavman long mekim gut ol bikpela haiwe rot na ol rot we i bungim ol hap ples we wok bilong mani i save kam long en. Long namba wan taim nau bai ol i silim rot bilong Sauten Hailans long Mendi-Koroba (Hela) i go moa long Komo long Hela provins.

Bihain long ol i bin sainim kontrak bilong Hela provins, tupela moa bikpela rot konstraksen projek em ol i givim long Nipa-Ambua na kontrakta Curtin Bros na Hela Bildas bai wokim wantaim mani mak bilong K187 milien na Halimbu-Nogoli rot long mani mak bilong K88 milien.

Dispela tupela rot apgred na konstraksen projek bilong

silim rot bai i gat 50 pesen sab-kontrak agrimen long strongim ol lokal kontrak long wok wantaim ol bikpela kontrakta, insait long ol hap ples bilong ol yet.

Curtin Bros em i wanpela bikpela kontrakta kampani long PNG we em i save wokim planti ol rot wok, tasol nau em i stap bes long Hela na wanpela bikpela lenona kampani husat i save mekim bikpela mani Hela Bilda, i kamap lokal kontraka olsem.

Sab-kontrakta agrimen bai

karampim wok bilong tupela kontrakta insait long 20 mun rot konstraksen bai kamap, pastaim long projek bai pinis long 2017.

Long makim gavman, Dipatmen bilong Woks i soim amamas long ADB long olgeta helpim em i save givim long kantri na dispela nau em i bikpela helpim tru long 800 kilomita bilong namba wan rot netwok bilong hailans rijon.

Dipatmen bilong Woks na Implementesen, olsem lida bilong pablik woks ejensi bai go het wantaim ADB Trens II we bai lukluk ol projek bilong Tambul-Mendi long mani mak bilong K167 milien na Kotna-Lapram long mak bilong K79 milien wan wan.

Dipatmen bai was gut long mani na wok bilong rot i mas bihainim gut ol mak aninit long kontrak, na i no mas gat senis i kamap na long ol i mas bihainim stretpela ensinia standet olgeta taim.

Dispela ADB trens I na II rot projek bai bungim ol dispela bikpela ikonik rot, namel long Sauten Hailans na Enga provins long kamapim gutpela rot bilong karim ol bikpela kago na pasindia i go i kam isi.

Aninit long mani we ADB i bin givim em, ol i bin stretim 110 kilomita rot bilong Mendi-Kandep na Laigam Pogera long mani mak bilong K339 milien.

Ol gutpela samting bai ka-

maut long ol dispela rot em olsem ol kes krop egrikalsamting na gutpela rot bilong kisim ol sevis bilong gavman olsem edukesen, helt na lo na oda.

Ol dispela bikpela gavman projek i bin kamap bihain long Praim Minista Peter O'Neill i bin go lukluk raun long Hela provins we PNG LNG projek i stap long en. Em i bin go wantaim ol gavman minista deligesen na ol bikpela gavman opisa long opim dispela bikpela K600 milien projek bilong putim kolta insait long provins.

Mista O'Neill i bin go long Tari, Koroba na Komo long statim Nipa i go long Tari, na Tari i go long Komo na Tari i go long Koroba na i go moa long bung wantaim Kelab long putim kolta long olgeta dispela rot.

Infrastraksa developmen aninit long O'Neill-Dion gavman em i namba wan, na em i kamap olsem wanpela gutpela samting i kam long wanpela gavman bilong PNG bihain long 40 ya eniviseri pastaim long kantri go bungim ya 2018 taim bikpela ikonik miting, APEC bai kamap long kantri.

Hailens haiwe em i karim ikonik blut bilong ranim kantri stat long ya 1953 taim namba wan kar i bin ran long long dispela haiwe aninit long gavman bilong Australia i kam inap nau.

Goilala DDA bod kisim opis

GOILALA distrik long Sentral Provins em i wanpela distrik long kantri we i no gat bikpela developmen, na sevis i save go bikos ples i gat ol maunten na bus, na i no gat gutpela rot i stap long ol pipel i go i kam isi.

Ol pipel i wok long kisim taim long ol rot i bagarap na ol instrastaksa olsem etpos, skul, helt senta na ol narapela i no gutpela. Tasol wanpela samting tu em i stap long pasin bilong ol pipel we ol i no save gat gutpela tingting long rispekim ol narapela lain na ol samting bilong gavman.

Goilala distrik edministresen i bin wok long stap mekim wok long Konedobu, hetkwata bilong Sentral Provins long Pot Mosbi. I gat stori i stap olsem ol mani bilong mekim wok developmen em i go go long ol narapela samting.

I no gat sain bilong edministresen i stap long Goilala inap long dispela taim.

Goilala distrik i gat tripela lokal level gavman kaunsil i stap em; Tapini, Woitape na Guari.

Wantaim wanpela tok promis seremoni long Goilala Distrik Atoriti Bod Memba long Sarere las wik, dispela kain stori bilong Goilala em i senis nau. Nau ol pipel i laikim senis na larim developmen long kam insait na go bikpela moa yet.

Siaman na memba ilek William Samb long Sarere i bin tokaut long Tapini gavman stesen long wanpela tingting we O'Neill-Dion gavman i gat long we bilong bringim sevis i go long distrik level.

Long taim bilong mekim tok promis seremoni, Mista Samb i tokim ol pipel long Goilala olsem, maski ol ausait lain i tingim Goilala olsem baksait bilong buk, wantaim nupela lukluk bilong nupela DDA bod, ol bai bringim ol bikpela sevis long pipel i ken kisim gutpela sindaun wankain olsem ol narapela Papua Niugini pipel.

"Goilala em i no sosaiti bilong ol trabel man o raskol man, mipela i laik senisim dispela pasin, go insait long nupela developmen pasin

long karim Goilala i go het," em i tok.

Em i tok, Goilala distrik edministresen nau i stap mekim klinap ekseis na i gat strongpela tingting long kisim distrik i go het.

Mista Samb em i wanpela enjinia nae m i laikim olgeta pablik sevan long stap long distrik long mekim gut wok developmen.

Samb i tok bipo i no bin gat fainensol ripot i save go long Dipatmen bilong implementesen na Rurel Developmen, Fainens na Plening long bihainim ol fainens lo bilong gavman

Em i tok ol i no save gat 4-ya developmen plen bilong distrik i stap olsem na dispela i save kamap olsem wanpela bikpela samting i pasim wok long kirap.

Ol opisa bilong Dipatmen bilong Nesene Plening, Implementesen na Rurel Developmen, polis, ol distrik pablik sevan, skul pikinini na ol ples lain i bin kamap long LLG hetkwata long Tapini na lukim dispela tok promis sainim seremoni.

Benk i go long Menyamya

Ol benk opisa bilong BSP brukim bus i go insait long rurel Menyamya long bringim benk ejensi na EFTPos sevis



BENK Saut Pasifik (BSP) Bulolo tim; Henry, Edward na Martin, wantaim menesa Joe Makinta, wokabout 12 haua long rot i go long Menyamya long kisim nupela Ejen na ol

EFTPoS bisnis lain.

Insait long ol rurel ples bilong PNG, ol kastoma inap long wokim benking olsem deposit na widro mani wantaim ol ejen long ples strets.

Em i gutpela long yusim EFTPoS bikos em i no kos bikpela mani na em i seif long baim ol samting na kisim sevis bikos bai no gat kes mani long ol stilman inap long stilim.



Goilala MP Michael Samb sanap namel long olgeta memba bilong Distrik Developmen Atoriti Bod Memba wantaim 5-ya distrik plen long taim ol i kisim opis long dispela mun. Poto: Samson Kenderman - DIRD PR opisa



Ramu NiCo na BCCSG promotim kakao long Basamuk



Tupela wokman bilong CCIL, Jethro Kupo na Ivan Kondi i wok long kakao cloning long Basamuk taunsip neseri



Ivan Kondi wokim bading long nupela kakao sidlings

LONG 2013 ol bikman bilong PNG Kakao Kokonas Institiut wantaim Ramu NiCo Menesmen (MCC) Limited i bin sainim wanpela egri-men long wok-bung insait long pablik-praivet patnasip long sevim ol kakao fama long Raikos distrik long kakao prodaksen.

Insait long dispela agrimen em long PNGCCIL bai helpim Komyuniti Afes (CA) Dipatmen Egrikalsa seksen bilong Ramu NiCo long promotim kakao long ol projek eria bilong en long Basamuk na tu long kamapim ol kakao neseri. Dispela ol kakao neseri em i gat ol nupela sids na klon we sik nogut bilong kakao ol i kolim kakao pod bora (CPB) bai no inap bagarapim.

Long dispela taim lonsing seremoni i bin kamap long ples Tugyak klostu long Basamuk we i lukim Sif Eksekutiv Opisa bilong PNGCCIL, Dokta Ere-mas Tade i bin go na tu Vais Presiden bilong Ramu NiCo, Wang Baowen i amamas long planim kakao long promotim wok-bung long sapotim dispela agrikalsa indastri.

Long dispela taim tu i bin lukim CCIL i givim aut ol sids na klon i go long ol famas long Tugyak na ol arapela ples klostu.

Long las wik na kam long dispela wik tupela lain saveman bilong badim kakao klon i bin go long Basamuk na wok klostu wantaim Siaman bilong Basamuk Kakao Koporetiv Sosaiti Grup (BCCSG) long redim ol arapela sidlings gen we ol bai givim aut i go long ol famas na tu launsim.

Tupela wok lain bilong CCIL long Murunas em Ivan Kondi na Jetrop Kupo. Dispela tupela wokman i bin helpim long karimaut cloning na tu redim ol sidlings long 2013 na long las wik ol i bin go bek long helpim long wokim arapela badwud cloning gen. Dispela em wanpela teknikal wok we ol i yusim

han bilong kakao diwai we i gro pinis long wokim badding long kamapim nupela kuru.

Siaman bilong BCCSG, Tony Gaiyu i tok wok long redim ol klons long givim aut long ol fama nau i stap long bikipela neseri we i stap insait long eria bilong Ramu NiCo long Basamuk akomodesin eria long nupela taunsip.

Mista Gaiyu i tok BCCSG i wok klostu wantaim ol grup long ples long redim ol klon neseri we ol bai givim aut long promotim kakao prodaksen long ples. Dispela nupela klon em sik nogut bilong kakao CPB bai no inap bagarapim.

Em i tok ol wimen grup we i strong na soim intares long projek ya em ol lain meri long Mindre na Lamtub, Kuil, Dein, Tugyak na Dumbal.

Mista Gaiyu i tok olsem bikipela as tingting bilong BCCSG em long promotim kakao we sik CPB i no ken bagarapim na kilim indai. Moa long en tu em long strongim tingting bilong ol famas long ples long wok hat long kakao bilong ol na noken westim taim long wetim mani i kam long Ramu Projek tasol.

Gutpela wok bilong BCCSG i lukim ol i kirapim wanpela riteil hadwea stua bilong ol pinis long Basamuk we ol famas i ken kisim ol fam saplai na tuls long helpim wok bilong ol. Ol famas nau i no inap westim taim na mani long go olgeta long taun na ol agrikalsa saplais. Ol i ken sekim tasol riteil hadwea stua bilong BCCSG.

Mista Gaiyu i tok bikipela amamas bilong em i go long menesmen bilong Ramu NiCo (MCC) long promotim dispela PPP wok namel long Kampani na PNGCCIL.

Em i mekim bikipela tok salens i go long ol fama long Basamuk long holim graun na wok hat na long bihain taim kakao prodaksen bai helpim ol na famili bilong ol.



Ol i yusim bad stik blong kakao ol i kamapim long 2013



Tony em man bilong givim wara long kakao stret


**LATE
JEWELYN
MONDU**

DOB: 10/03/97
DOD: 21/09/15



**THANK YOU EVERYONE
FOR YOUR COMFORT AND
FINANCIAL SUPPORT
TOWARDS OUR HAUS
KRAI. GOD BLESS YOU.**

Australia i go insait long Ragbi Wol Kap fainel



AUSTRALIA Wallabies i go insait long Ragbi Wol Kap fainel na em bai pilai wantaim Skotland.

Olsem ol Nu Silan, Inglan na Frans i bin pilai long Tri wol kap fainel na i bin kirapim Web Ellis Kap long 1991 na 1999, Australia i bungim namba foa bihain long ol i stap pas long "Pul Ov Det" na i bin kisim ples.

Namba wan tim bai salensim ol em i wol namba 9 Skotland long long Mande moning long wik i kam long Twickenham. Dispela pilai bai strong tumas long wanem, ol i bin lus tupela taim long tripela pilai pinis.

Ol Irelen i strong tumas na daunim ol Frans, 24-9 na i strongim ples bilong ol long lata antap long Pul D na ol

bai pilai kwata fainel wantaim Ajentina.

Wina bilong dispela pilai bai egensim wina bilong Australia na Skotland long wol kap fainel bet.

Sampela gem bilong Nu Silan na Saut Afrika i no bin kamap long taim ol bin makim i kam inap long pinis bilong tonamen, tasol kosa bilong Australia, Michael Cheika, i no toktok planti long tim bilong em i go long fainel.

"Planti manmeri i mekim planti toktok long ol wanem kain ples we tim bilong ol i stap, tasol long pinis bilong pilai, i no gat wanpela dro we ol i mekim wantok sistem," Cheika i tok long Sarere bihain long ol Australia i daunim ol Wales, 15-6.

"Olgeta pilai i kamap strong bikos ol i stap long nok aut na bikpela samting em ol i go insait long fainel."

Ajentina i daunim ol Namibia, 64-19, tasol i nogat wanpela gutpela rekot taim ol i save egensim Australia bikos ol i save lus long olgeta gem ol i save pilai wantaim ol Australia.

Ol Ailan i bin daunim ol Wallabies tupela taim long tripela salens i bin kamap namel long Wallabies na Ailan.

Ol Nu Silan i save pilai gut, tasol ol Frans i bin pilai wankain egensim ol na ol i bin kisim wankain skoa.

Ol opim pilai bilong wol kap fainel, ol Wales bai pilai egensim ol Saut Afrika long Twickenham.

Jemeni na Polen i kwalifai long Euro 2016



WOL sempion Jemeni i lus long pilai wantaim Georgia long asples 2-1, tasol em i kisim ples long Euro 2016 pilai.

Polan tu i kwalifai long fainel bilong sama i kam, bihain long daunim Ripablik bilong Ailan 2-1.

Jemeni i nidim wanpela poin tasol long kisim ples bilong top tu long grup D, Max Kruse i kisim wanpela poin long 79 minit i mekim ol i kamap wina.

Thomas Mueller em i pilai bilong Jemeni na i mekim Jemeni long stap pas taim em i kikim wanpela fil gol i go insait bihain long taim bilong malolo.

Robert Lewandowski i kisim wankain poin olsem bipo straika bilong Noten Ailan, David Healy, i kisim 13 gol long Yuropian Sempionsip kwalifai kempen ol i bin mekim. Polan i kisim namba tu ples long Grup D.

Long ol narapela gem long

Grup, Steven Fletcher i skorim ol poin taim Skotland i lus 6-0.

Romania i kisim ples tu long fainel bihain long em i daunim ol b irua tim 3-0 long Faroe Ailan.

Denmak i kisim namba tu ples tu long Grup I na em i gat namba tu sans long pilai i stap i stap yet.

Potugal i kamap wina pinis long grup na i i strongim nem bilong em na i kamap kwalifai wina bilong nain-man Serbia 2-1 long Belgrade.

Japan i daunim Yunaitet Stet long Ragbi Wol Kap



JAPAN i daunim ol Yunaitet Stet (US) 28-18 long Ragbi Wol Kap na em i kamap long mak bilong em long em i save pinisim olgeta strong bilong em long kamap wina.

Japan i namba wan tim long kamap wina bilong Tri Pul Stej pilai na i go aut.

Trai bilong Kotaro Matsushima, Yoshikazu na Amanaki Mafi i helpim ol long ol i kamap wina we ol i laikim long en, tasol pilai i bin kamap long Gloucester em bikpela feil ol i bin mekim, bihain long 3-pela wik taim ol i bin daunim ol Saut Afrika.

Japan i no wari long namba 4 taim lus bilong em na i daunim ol US wantaim olgeta las strong bilong ol.

Skotland i daunim ol Samoa bai mekim na ol Japan bai pinisim namba 3 ples long Pul B na ol Japan bai hostim dispela tonamen long 2019.

"Mipela i no pilim orait tasol mipela i gat bikpela Wol Kap we mipela i bin pilai bipo na nau mipela i pilai tu," Kosa bilong ol Japan, Eddie Jones i tok.

"Pilai i bin kamap namba wan tru. Ol boi bilong mi i pilai gut wantaim olgeta tim spirit olsem ol i save pilai

ragbi," Jones i tok.

Bihain long 5-tim grup long yia 2003, i no gat wanpela tim i win 3-pela taim long Foa Pul Stej na ol i no go het long neks raun, nogat.

Japan i feil long kisim bones poin bilong em, tasol em i pilai strong nau em i amamas long pilai long Kingsholm pilai graun.

Ol Gloucester sapota i kirap na tok gut bai long Japan na nau em i redi long hostim 2019 tonamen long asples bilong em bikos Japan i lukim olsem spot em i wanpela bikpela samting tru.

Whincup bai fesim bos bilong Tim Holden



Ol foto: NRL

WINA bilong Bathurst 1000, Craig Lowndes i tok Jamie Whincup bai fesim bos bilong tim Holden, Roland Dane, long em i bin salensim ol oda bilong tim.

Lowndes, i tok aut olsem Dane i bin belhat long toktok long Whincup long las Sande nait taim narapela pilai tu i go bagarap.

Whincup i stap long namba tu ples long Maunt Panorama taim ol i putim em i stap bek yet 20 lep long Bathurst pilai graun na bihain ol i rausim em long draiv i go pas long narapela sefti kar.

Whincup i no harim tok bilong Dane na i ron yet long hap bilong resis na Ford

Scott Pye i bumb antap long maunten.

"Em bai no inap dil wantaim em nau," Lowndes i tok-tok taim em i bin lukim eksen bilong Dane taim Whincup taim em i mekim asua long ai bilong ol manmeri.

"Dane bai toktok wantaim Whincup, taim mipela bai go long haus.

"Ol oda bilong tim i karamapim mipela. Em bai givim wanpela gutpela risen, long wanem na em i bin mekim olsem."

Bihain Whincup i tok olsem em i bin lukim grin lait antap long sefti kar taim em i go pas.

"Mi stap aut bikos mi les

long bihainim Lowndes na taim mi kam antap long maunten, mi lukim grin lait na mi draiv pas," Whincup i tok.

Tasol, em bai givim wanpela gutpela risen bikos Dane i lukluk stap na em i bin mekim olsem.

Whincup i go pas, tasol taim em i bin wokim asua na stop longpela taim long tok-tok long dispela asua, ol narapela kar i go pinis.

Lowndes i kamap pas long pit-len na namba foa na las em sefti kar i kam baksait long em. Tasol, Whincup i hariap tru i kam pas long sefti kar na ol i rausim em long resis.

PNG Independens De kap long Filipin i sta tripela yia i go pinis

OL Papua Niugini sumatin husat i save skul long Adventis Yunivesiti bilong Filipin (AUP) i kirapim PNG Independens De Klap long yia 2013 long mun Oktoba.

Dispela klap em ol i bin statim long AUP long Cavite taim PNG i bungim 38 independens aniveseri bilong em na ol i pilai yet insait long tripela yia pinis.

Long 2015 independens aniveseri em ol i bin pilai na em i makim namba tri taim bilong ol long dispela tonamen bilong ol.

Philemon Wera, em i bilong Simbu Provins na i save stadi long Filipin i eksperiensim namba wan taim bilong em long pilai ragbi long Filipin aninit long PNG Independens

De Ragbi Lig tonamen.

Ol tim husat i pilai aninit long dispela lig em AUP Lions, Batangas Red Horse, Indang Rebels, Per South Brothers, Recto Royals na United Vikings.

"Ol sumatin i stap long stadi bilong ol na i gat planti skul wok, tasol ol i ogenaism Ragbi Lig tonamen long amamasim Independens De bilong PNG long Filipin em i bikpela samting tru," Wera i tok.

"Dispela em i wanpela de tasol we ol pipel bilong PNG husat i save stap long Filipin i save go bung long wanpela hap long amamasim de bilong PNG.

"Dispela tonamen em mipela i ogenaism gut tru na pinis long taim mipela i makim

na olgeta manmeri i amamas."

AUP Lions na United Vikings i bin pilai long fainel, na i no gat wanpela trai i bin kamap bikos tupela tim wantaim i strong tumas.

Planti ol man Filipin i lukim mipela i pilai na ol i stat tren long ol wan wan skul we ol i save stadi long en.

"Mipela i gat planti ol poro long Filipin long wankain skul na ol i amamas long join na pilai, tasol ol i no trastim ol yet na ol sapot tasol long taim bilong pilai," Wera i tok.

Em i tok olsem nau ol i tok-tok wantaim planti ol teseri institusen long pilai wantaim bikos long yia 2016, dispela Ragbi Lig tonamen bai kamap na ol bai pilai long wan ful yia.

Guria em sempion bilong Melanesia



Ol pilaia bilong PNG Agmark Gurias i amamas wantaim kap ol winim long Melanesia Klap salens long Sir John Guise Stadium long Pot Mosbi long las wik Sarere. Foto: Nicky Bernard.

Nicky Bernard i raitim

PNG AGMARK Gurias em sempion bilong Melanesia bihain long ol daunim Sebato Roosters bilong Fiji long klap sempionsip bilong Melanesia long Pot Mosbi.

Sir John Guise Stadium i no pulap tumas long wanem dispela klap salens em namba wan taim ol kamapim long bringim ol Melanesia kantri long strongim ragbi lig insait long kantri bilong ol.

Fiji na PNG tasol save pilai ragbi lig na level bilong ol i antap liklik long ol narapela Melanesia kantri.

Gurias em sempion tim bilong yumi long PNG bihain long em i winim Digicel kap long Septemba. Dispela i mekim em kwalifai long pilai wantaim sempionsip bilong

ol Fiji Sebato Rooster.

Sebato Rooster tu em sempion tim bilong Fiji bihain long ol winim gren fainel long lokal ragabi lig resis bilong ol long Fiji.

Dispela Melanesia Klap sempionsip em namba wan taim ol kamapim na dispela sempionsip i pulim ai bilong planti klap long Fiji na PNG.

Gurias i bin redi gut tru long dispela salens na ol i no westim taim long taim bilong pilai. Ol putim 8-pela trai olgeta wantaim 7-pela kik go insait long bringim skoa go antap long 42 long taim pilai i pinis.

Sebato i gat ol gutpela na bikpela man bilong pilai tasol ol nogat stail bilong pilai olsem ol Gurias, dispela i mekim ol i no bin putim wanpela trai. Ol i kisim penalti kik tasol long bringim skoa bi-

long ol go long 2-poin tasol.

Kepten na Kosa bilong Sebato Roosters i tok level bilong pilai ragbi long Fiji i daunbilo liklik long PNG olsem na PNG gat bikpela sans long win long ragbi salens.

Tupela i tok tu olsem nau ol kam pilai long PNG wantaim ol Gurias i apim gutpela tingting na pasin bilong ol pilais bilong ol Sebato long go bek na soim we PNG save pilai ragbi.

Wina bilong 2016 Digicel kap bai flai go long Fiji long salens wantaim wina bilong ol Fiji long 2016 Melanesia Klap sempionsip.

Ol Gurias mas pilai strong long 2016 na winim Digicel Kap salens long go long Fiji long holim strong dispela kap ol i winim long las wiken.



Ol AUP Lions pilaia i soim stika bilong 40 yia independens aniveseri bilong PNG bihain long pilai i pinis.



Pilaia bilong AUP Lions i laik brukim banis bilong ol Recto Royals, tasol Royal pilaia i mekim wan man takel na i pusim em i go bek long sait bilong ol Lions yet long PNG Independens De Kap tonamen i bin kamp long Filipin we ol PNG sumatin i ogenaism.

Ol PNG yet i mas ranim PNGRFL

NUPELA Sif Eksekutiv Opisa bilong Papua Niugini Ragbi Futbal Lig (PNGRFL), Bob Cutmore, i tok olsem PNGRFL i mas go bek long han bilong ol PNG na ol yet i mas ranim.

Cutmore i bin kisim posisen na kwiktam tru mekim ol wok we em i bin tingting long mekim.

Em i no bin pilim orait taim PNGRFL i no go orait long liklik yia i go pinis.

"Mi ting olsem PNGRFL i mas i go bek long han bilong ol PNG yet na PNG yet i ken kisim ol posisen bilong PNGRFL asosiesen," Cutmore i tok.

"Olgeta posisen i mas i go

bek long ol PNG yet na mipela bai stat long sekim gut olgeta wokman na meri, na ol narapela institusen we PNGRFL i save ranim."

Cutmore i tok moa olsem, "Mi kisim dispela posisen bilong CEO em i no isi wok, na mi bai nidim sapot bilong olgeta wok manmeri bilong PNGRFL."

Em i tok em bai no inap long tokaut stret ol wok ol i bin mekim bikos em i bin stat wok tripela de tasol we em i bin stat long las Fraide.

Long dispela as tingting, em i bin sekim ol wok long PNGRFL na autlain bilong wok taim em i bin kam long

las wik, na i askim ol wok lain long ol i bin wok olsem wanem bipo.

"Taim mi gat hatpela wok i stap long han, mi bai mekim ol disisen we olgeta lain bai no inap long pilim orait long en," Cutmore i tok.

Siaman bilong PNGRFL, Sandis Tsaka, i welkam nupela CEO na i tok, "Cutmore i karim planti menesmen eksperiens wantaim i kam bikos em i bin stap wantaim Brisbane Broncos."

"Planti tok save ol bai mekim long sait bilong menesmen bihain long bung ol bai holim long Holide In long Oktoba 29," Tsaka i tok.

NSL bai kamap klostu taim

PAPUA Niugini Nesanel Soka Lig (PNGNSL) resis bilong 2015-2016 bai stat long Novemba 14.

NSL i tokim ol klap husat ol i bin makim pinis long en long soim intres bilong ol na givim nem bilong klap bilong ol wantaim K5000 fi, na dispela rejistresen taim i pas long Tunde apinun.

Dispela pilai em liklik namba bilong tim tasol bai pilai we, 5-pela klap bilong Sauten rijon na 5-pela klap bilong Noten rijon, na tu, tim husat i mitim mak bilong afiliisen bai i go insait.

Mak bilong ol klap husat ol i bin makim pinis long en i mas kam aninit long kampani na rejista wantaim IPA, na i no gat wanpela asua i stap long onasip bilong klap.

Ol klap i mas i gat pilai graun bilong ol yet o i gat plen long kamapim pilai graun insait long tripela yia.

Ol i mas i gat inap mani long bungim olgeta nid bilong mani long taim bilong pilai.

Yia afiliisen fi em i K60, 000 na ol i mas baim bipo long Oktoba 30, na ol ona bilong tim i mas givim lista bilong pilaia bilong ol wantaim

tim menesmen wantaim tupela paspot sais poto long wankain taim.

Tenpela klap i soim intres bilong ol long pilai em Besta PNG United FC, Admiralty FC, Hekari United FC, Lae City Dwellers FC, Morobe United FC na PKA Rapatona FC.

Foapela i soim intres bilong ol tasol ol bai kam insait bihain em, FC Port Moresby, Lakatoi FC, Goroka FC na Tavur FC.

Telikom NSL na PNGFA i tokim olgeta klap olsem olgeta tim ol i makim long en ol bai redim ol travel na akomodesen kos.

Meri Morobe winim K20, 000 long Trukai promosen



Nesanel Marketing Menesa (Promosen na Ivent), Maryanne Hereva, na tupela polis opisa i bin sanap long sait na i soim nem bilong laki wina, Yaisa Palai Jungga, husat i winim K20, 000 kes mani long Hamamas Wantaim Trukai promosen long las wik Fraide.

Philemon Tame i raitim

TRUKAI Industri i givim moa long K100, 000 long ol kastoma bilong em husat i bin laki long kamap wina long Hamamas Wantaim Trukai promosen bilong em.

Em i bin statim dispela promosen long mun Ogas 10 we 80 pipel i bin kamap laki wina na wan wan wina i kisim K1, 000.

Ol i bin mekim dispela promosen long amamasim 40 yia indipendens aniveseri bilong Papua Niugini na tu, 45 yia aniveseri bilong Trukai Industri.

Long las wik Trinde, ol i mekim K10, 000 wik dro, na long Fraide, ol i bin mekim bikpela dro bilong ol wantaim kes mani mak long K20, 000.

Yaisa Palai Jungga, em i wanpela meri long Morobe provins, i kamap wina bilong dispela K20, 000 promosen.

Trukai Industri tu i bin pinisim promosen bilong dispela yia wantaim dispela bikpela kes mani dro.

Samting olsem 85, 258 manmeri i bin go insait long kes dro, na ol i kisim nem bilong Yaisa Jungga olsem wina.

Trukai i bin lukim olsem Nesanel Kapitel i kamap namba wan long go insait long dro wantaim 13, 233 entri, Maunt Hagen i kamap namba tu wantaim 11, 703, Morobe i kamap namba tri wantaim 11, 636, Isten Hailans i kamap namba foa wantaim 10, 081 na ol narapela provins wantaim.

Trukai i bin toktok wantaim ol wina long Mosbi na ol i amamas tru long Trukai long promosen em i bin mekim.

Heau Hitolo, em i wanpela mama husat i no save wok mani, i bin kamap wina long dro ol i bin mekim long wik tri na em i bin amamas tru taim Trukai i bin tokaut olsem em i winim dispela dro.

Benson Felihau i gat 5-pela krismas i kamap wina bilong wik faiv dro.

Nesanel Marketing Menesa long Promosen na Ivent, Maryanne Hereva, i tok, "Ol spesol ivent olsem indipendens na aniveseri em ol gutpela taim long givim i go bek long ol gutpela kastoma insait long kantri."

"Mipela i lukim planti lain i kam insait long 17 provinsal senta bilong Trukai, na

mipela i amamas tru. Trukai i bin mekim sampela bikpela promosen long bipo, tasol dispela em i bikpela kes prais mipela i givim aut," Hereva i tok.

"Tasol, mipela i salim tok lukaut long ol gutpela kastoma olsem, ol nupela teknoloji olsem finga tip i stap pinis na ol trik manmeri i pulap na trikim ol pipel long dispela kain promosen.

"Ol kastoma long olgeta hap long kantri i mas lukaut taim ol i kisim ol teks mesej na i toksave olsem ol i winim wanpela kes prais long ol kampani husat i ranim konsuma promosen. Trukai i tok lukaut olsem em i no save salim teks mesej long ol promosen wina."

Trukai Industri i opim wanpela nupela Fesbuk pes long taim bilong Indipendens na i ranim tupela kompetisen wankain olsem Hamamas Wantaim Trukai promosen.

Dispela promosen long intanet i bin pinis long las wik Fraide tu, na laki wina bai winim wanpela trip long go long Rapopo Plentesen Risot wantaim wanpela bes poro.

Dekenai i givim K6, 634 long Malalaua Ragbi Lig gren fainel

MALALAUA stesen ragbi lig bai kamap gen long namba wan taim bihain long 10-pela yia taim rot konstraksen kampani, Dekenai Konstraksen Limited i givim K6, 634 sek mani i go long Malalaua Ragbi Lig long kamapim gren fainel bilong ol.

Namba wan presentesen we papa bilong Dekenai Konstraksen Kampani, David Fallon, wantaim projek menesa bilong em, Jim Taparu, na ol petron bilong asosiesen i amamas long sapotim ol yangpela spotman long provins.

"Dekenai em i wanpela namba wan kampani long komyuniti na i save i gat 600 wok manmeri long dispela eria na nau mipela bai sapotim ol lokel yet," Fallon i tok.

Dekenai kampani i lukluk long nupela rot konstraksen long Malalaua stesen i go inap long Kerema we provins i gat bikpela sans long rot bai go insait long kisim ol gutpela risos i stap long eria.

Presiden bilong dispela kompetisen, George Lare, na Vais presiden bilong em,

Emmanuel Oii, i kisim kes we Dekenai i givim na tupela i bin amamas long helpim ol long taim stret.

Lare i tok, "Dispela mani em mipela bai yusim long baim tropi na ol medol bilong tim bai kamap wina long gren fainel."

Ol yangpela mangi i kamapim dispela kompetisen insait long tupela LLG kaunsel wod long Taure na Lakekame eria long Is Kerema distrik long Galp Provins.

Lare i tok tenkyu long Dekenai Konstraksen na i tok, "Dispela em i namba wan taim we kopret kampani i givim dispela kain helpim na sapotim viles kompetisen bihain long planti askim mipela i save mekim long Galp Provinsal Edministresen na memba bilong Kerema, tasol i no gat wanpela liklik sapot i save kam insait."

Mipela i stat wantaim 12 klap, tasol mipela i sot liklik long mani na namba bilong tim i go daun gen lo 10-pela tim," George i tok.

"Kompetisen i join wan-

taim PNG Ragbi Futbol Lig long kantri na olgeta klap i mas rejista kwiktaim long statim tru kompetisen.

"Klap em i stap 10 yia nau tasol klap i no gat inap mani na tu, bikpela wara tait i kamap long wara Taure i karamapim olgeta stesen na mipela i stopim pilai long sampela taim.

"Ol bai senisim hap bilong pilai i go long narapela hap long Terapo Katolik Misen Stesen bikos em i namel hap bilong olgeta tim long kamap kwiktaim na tu, em i gutpela hap," George i tok.

Lig i gat A Gred na B Gred we ol yangpela i gat 17 na 18 yia tasol i pilai. As tingting bilong dispela lig em bilong stopim alkohol na drag, na long go insait long Galp Isapea tim long Digicel Kap.

Asosiesen i gat trpela tim long Is Kerema na tupela long kostal sait, na olgeta narapela tim long Mailovera viles.

Gren fainel bilong ol em ol bai pilai long namba wan wik bilong mun Novemba.



Mausman bilong Dekenai Konstraksen Kampani Limited i givim sek mani mak long K6, 634 long Malalaua Ragbi Lig Asosiesen long karim aut kompetisen bilong ol.

TABUBIL to PORT MORESBY
More than just flying; Linking you affordably because we care.

One way PGK665.80*
Valid from 15th October to 01st November, 2015
*Taxes inclusive

"Specials Available now"

Linking our country


Reservations - Toll Free: 1805465 Email: sales.linkpng@airniugini.com.pg
Find us on Facebook: www.facebook.com/linkpng

LinkPNG


Melanesian Klap Sempionsip piksa



Tim Agmark Gurias, PNG.



Peceli Tettei bilong Sebato Rooster i lukluk long pasim bal long ol wan pilai bilong em.



Tupela pilaia bilong Gurias i apim pilaia bilong Roosters.




Top kika bilong Gurias, Jason Mission, i traim long brukim bainis bilong tupela Sebato Roosters. Gurias i winim pilai 42-2.



Tim Sabato Roosters, Fiji.

Ol poto: Nicky Bernard



IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA Tuna



Emi tuna
bilong PNG



Manufactured by



RD Tuna Canners Ltd.

Moa mit na
oil insait



TUNA IN OIL

Hammerheads i sempion bilong Nesenel Provinsal 7's resis

Noken Dring Na Draiv

Oi biknem bilong Kriket long Australia, Nu Silan na Inglen i kam stap long Pot Mosbi long pilaim Bikpela Bash bilong legen T20. Oi tu bai raun long ol skul long soim ol pikinini long we bilong pilaim kriket na tu, karim aut kempen bilong Noken Dring Na Draiv. Oi bai stap wanpela wik olgeta.

Poto: Nicky Bernard



Philemon Tame i raitim

MOROBE Hammerheads em ol sempion bilong 2015 Nesenel Provinsal 7's resis.

Oi Morobe i daunim Otonomas Rijon ov Bougainville (ARB) 24-15 long gren fainel long Sir Hubert Murray pilai graun long Pot Mosbi long las wik Sande.

Morobe i bin go long gren fainel bihain long em i bin daunim ol Is Nu Briten 12-10 wantaim tupela poin tasol na ARoB i daunim wanpela asples tim, CRU Boromas 24-22 wantaim tupela poin tu na tupela wina i go long gren fainel.

Narapela tim bilong Momase rijon, Madang, i kisim plet i go long asples bihain long ol i daunim ol mangi long Bei, Alotau 24-19.

Oi Kimbe Rebels i daunim ol Goroka Kilituas 19-12 long bowl pilai.

Long fainel bilong ol meri, ol Spartens i rausim kap i go,

taim ol i daunim Harlequins 29-5 na ol Sauten Sif i daunim ol Barbarians 40 nil na winim plet.

Long wankain taim, ol Hohola Flies i daunim ol Crusaders wantaim 20 nil na winim bowl.

Porebada Bulldogs i stap pas yet long ran bilong ol long Sentral Provins premia ragbi lig resis, na i daunim ol Keakalo Trekkers 14-6 long Kone Tigers pilai graun long Waigani.

Dispela em i namba tri taim ol i win yet na nau ol i stap long gutpela posisen bikos preliminari fainel dro bai kamap klostu.

Long plet divisen, tim Aroma Kos Is na Rigo Magani i redi long pilai egensim Hallsound Bay na Mekeo Hawks tasol tupela birua tim i no stap na ol i no pilai.

Long wankain taim, ol AZB Seagulls i daunim ol Bereina Stars we skoa i sanap olsem 18-0.

Long Kap salens, Hisiu Knights i daunim ol Tauruba Blaks 30-0 na Aroma Kos Wes i daunim ol Goilala Karuka.

Smail Wantaim



Good Products, Better Prices, ikam long

Johnstons Pharmacies Ltd

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg